



顧亭林先生年譜  
附錄  
二





顧亭林先生年譜

附錄

(二)

張穆編

王雲五主編  
叢書集成初編  
顧亭林先生年譜  
附錄  
二册

中華民國二十六年十二月初版

編者 張 穆

發行人 王 雲 五  
長沙南正街

印刷所 商務印書館  
長沙南正街

發行所 商務印書館  
各埠

顧亭林先生年譜卷二

八年己酉五十七歲

春入都寓七聖庵旋往山東已復入都寓文昌閣三月往昌平五謁天壽山及懷宗懋宮是行也與

李子德偕

元譜 穆案受祺堂詩集有舊年甯人先生以無妄繫濟南走書報我觸暑馳視苦疾作辭還先生寄贈行三十韻詩春日晤保州重會薊門奉答前詩廣五十韻一首詩有云甫定他鄉榻俄從上日航自註先生以二月朔至又云每詢

邱邑樹誰薦寢園櫻自注時在清明是先生此年與子德會合及謁陵之時日也二月朔至保定一節譜亦失載又案江藩宋學淵源記謂天生於甲申乙酉間與先生冒鋒刃閒關至燕中兩謁愍帝懋宮是并先生詩文集亦未之見也 回都移

寓公肅甥邸舍

元譜 穆案時公肅起補國史院修撰旋進祕書院侍講秋典試陝西

四月出都至順德歷邯鄲返章邱與謝長吉對簿案始

結

元譜 先生有與顏修來手札云夏初匆匆出都歉然之懷難以筆道想道履彌勝大業彌增令叔先生今在都門亦當聽鶡起之音奏鹿鳴之什矣弟久滯安德仰藉洪庇章邱一案已得小結雖陷害之情未明而霸占之律已正轉蓬思息倦鳥知還九仞

之功非仗婁侯不能終此一贊敢乞鼎致其詳在札中未緘以舟老正值文場不敢瀆札并乞於試畢日道念小价王登往莊故另遣潘一廉其人謹懇望示回諭詳文於二十日後到廳更懇家報中速聞之至禱至禱

赴大名歸巡保

定冬抵平原潘次耕來受學

穆補案 途初堂集補遺有己酉冬自淮陰抵平原呈亭林先生六十韻詩詩末云汝野黃雲凍沂山百草枯隻身經雨雪遠道涉崎嶇先生答詩云蕭蕭行李鴈飛秋是次耕以

冬初謁先生於平原也。

十一月至都主申叔旆又主謝方山重輝。

元譜方山名未詳穆案方山名重輝德州人以父陞廩官至刑部郎中陞字伊晉萬曆丁未進士官至建極殿大學士

國初徵爲左柱國內院大學士卒謚清義宋牧仲李湘北田山彙集中均有與方山酬倡之作趙鈞山談龍錄舉本朝詩人山左有九皆各有所就了無扶持依傍而德州謝刑部方山重輝居其一漁洋詩話稱其過鏡佛寺詩池北偶談又述方山言銀瓦寺古鏡事又嘗序其所著杏村集曰去膚存骨去枝葉存老幹真賞甚稀存之篋中以待元次山杜清碧其人定相賞於弦指之外可謂推弊不遺餘力而臨清汪灝送方山告歸詩云真得意時惟嘯咏不知人處是功名蓋亦恬於進取者又案鶴徵錄潘次耕之試鴻博也由左諭德盧琦及刑部主事謝重輝薦舉然則方山學行亦約略可見矣先生有與顏修來札云老年臺旣晉秩寅清而令兄復駿蜚東國凡在知己莫不欣忭弟有訟事未了尙缺叩賀茲有德州方山謝年兄入都附此申候方山爲內院清義公之家嗣翩翩文雅更能熟於古今少年中鮮其儔匹屬以蔭職赴部一切仰祈照拂綠弟夏秋主於其家昕夕對譚心所歸依惟在門下至於居官涉世之道亦望時時提命貴鄉才俊可爲後勁不俟弟言之畢也冬杪圖晤不悉中懷穆案札云晉秩寅清者修來以中書舍人恭逢聖祖臨雍加恩四武遷禮部儀制司主事也云令兄駿蜚東國者修來兄光猷以是年秋領本省鄉薦也

是年次甥秉義中式順天舉人

執友王起田王思齡歿

元譜思齡里居

出處無攷

是年詩有樓桑廟一首有事於櫜宮一首贈李貢士嘉一首邯鄲一首邢州一首自大名至保定子

德已先一月西行一首潘節士之弟來遠來受學一首

徐譜案是年潘耒將讀書於婦翁王略家六月略卒十一月耒妻亦卒故耒去山陽適平原也時當已冬盡矣

有謁櫜宮文王起田墓志

九年庚戌五十八歲。

四月往德州。六月程正夫、李紫瀾延先生於家講易。至九月初講畢。卽以是月入都。九日與朱錫鬯及

嘉定陸翼、王元輔在北平孫氏研山齋詳定所藏古碑刻。

元譜謙案。元輔號鞠隱。經學湛深。陶庵弟子。學術志行。不愧師門。曝書亭集跋李龍眠九歌圖卷。康熙庚戌九月九

日。借崑山顧炎武甯人。嘉定陸元輔翼王。永平申涵光覺孟。嘉興譚吉璣丹石。觀於宛平孫氏研山齋。是年竹垞又有同紀。處士映鍾杜太史鎮。譚舍人兄吉璣集孫侍耶研山齋四律。其弟三首尾句云齊東回首望。最憶虎頭癡。自注謂顧子炎武。蓋研山一集之後卽

出都。竹垞復有宴集而憶及之也。

出都。至曲周訪路安卿。

歷河南至山西。復回山東度歲。

是年初刻日知錄八卷。元譜

徐譜案。初刻八卷。本有七七一條。今刻本無見。全謝山經史問答。今刻本第六卷有一條。有錄無書。是錄爲先生自定。書則經後人刪潤也。

長甥乾學登進士一甲三名。

元譜。穆案。是年公肅擢國子監祭酒。

備園集書錢糧論後曰。舅氏亭林先生學博而識精。於天文、河渠、禮樂、兵農、錢穀之故。上下古今。洞悉原委。數往來畿輔。齊魯、秦晉間。盱衛時事。間有所作錢糧論二篇。至爲痛切。仲長統昌言崔寔政論之儔匹也。某昨歲對策。謂須得公忠強幹之臣。權萬物之有無。計百姓之贏絀。而爲之變通。蓋寔本於先生之論。紹基按。健庵對策云。漢唐三代。以帛爲租。宋始用錢。金章宗鑄銀曰。承安寶貨。公私迄今用之。礦脈久閉。海舶已停。民間之銀日耗而不生。而上供者必以常額。宋齊邱有言。錢非耕桑所得。以錢收稅。是教民棄本逐末也。此寔本於錢糧論。

是年詩有述古一首。德州講易畢奉柬諸君一首。輓殷公子岳一首。

元譜岳。字伯巖。一字宗山。雞澤人。有韻耕草堂詩集。穆案。池北偶談。殷岳工

五言古詩平生不解爲近體常爲唯寧令輒自罷歸

是年程正夫有贈先生序云東吳顧亭林先生今之大儒於書無所不讀習熟國家典制以至人情物理淹貫會通折衷而守之卓乎爲經濟之學者也而失意於時君子惜之以故北游上國歷燕趙之墟上太行渡黃河出塞入關極秦晉之鄙折而罨滯於齊魯間皆得周覽其名山將以擬太史公之故事乃每過吾州輒見訪如僑札之歡皋梁之托也爲余談說經史不憚媿媿或匪信宿或浹月經時然後乃去因見其著述之富汗牛充棟要皆崇正黜邪一軌於聖賢之微旨抽關啓鑰盡見其全其辯詳以覈其論典以要其思平實以遠其義純粹以精本於經而不泥於昔聞原於史而不拘於成說多前賢所未明一旦自我發之者自漢唐以來諸賢林立觀其意思略與鄭康成王文中輩相彷彿皆能深造理窟立道大雅以斯文爲己任者也以視今之作者不啻奏黃鐘大呂於秋蟲響答之前其鉅細不侔矣假使先生得時而駕爲當代柱石功業所至不過封侯而止其於閑先王之道以津逮將來爲天下後世之利且孰得而孰失乎今年結夏於此與二三同人講易復得發其日知錄一書觀之多攷古論世之學而其大指在於明經術扶王道爲之三歎服膺勸其出以惠學者此自亭林支峯蔓壑余老病荒忽書數語其後附以不朽必欲東觀大海盡十洲三島之奇則有先生所著之全書在非一朝一夕所得而卒業者矣余不佞倘如豫之五爻疾而不死請得讀書養氣十年之後文思少進

爲先生細論之康熙九年八月

是年爲路安卿之舅氏王君國翰撰墓志銘

十五年辛亥五十九歲

從子洪善洪慎來省先生於都門入都主原一甥家夏熊青岳閣學欲薦先生佐修明史力辭之

元譜謙案青岳名賜履字敬修孝感人順治戊戌進士謚文端又戊午答潘次耕書云辛亥之夏孝感特簡相招欲吾佐之修史吾答以果有此命非死則逃原一在座與聞都人士亦頗有傳之者耿耿此心終始不變云云

出都歷忻州

之靜樂平定州之孟縣至太原

元譜穆案是年太原知府爲延津周令樹曝書亭集辛亥年春有送周郡丞令樹遷太原守詩是也令樹重建晉祠碑亭記往崑山顧炎武爲令樹言唐宋人題名及詩多刻之古碑

陰碑陰旣滿往往闌入行間此獨以御製御書唐人無敢刻一字至宋始有題名碑陰及兩旁者而正文特完好云云按記作於明年壬子端午後三日所謂往者卽此年事也令樹字計百順治乙未進士

爲太原守周計百令

樹點定荀悅漢紀

穆補遂初堂集代人作重刻漢紀序晉陽書肆之書漫不足觀民間又鮮藏本間訪傅青主徵君於松莊案間見有荀氏書喜甚假以歸手自校讎往往與班書相出入蓋荀書雖據班書他所據探尙多故頗存異

同又有班書所未載者參得失廣異聞固悅本志也後人每据班書以改此書而其誤彌甚宋巽巖李氏已言印本多譌此本爲明黃姬水所刻舛錯不少適顧亭林先生來爲點定一過刊誤存疑遂爲善本云云案次耕雙塔寺雅集詩序出太原郡城東南行七八里松莊傅隱君青主所居也太守延津計百周君歲之初吉率子若壻屏驕從挈壺觴躬造於廬是訪青主者爲郡守周令樹也又次耕太原守周令樹墓志云余布衣時嘗讀書太原署中則此敘卽代周作也又九日同惠元龍家雙南兄登瑞光寺塔詩注辛亥九日同閨古古傅青主飲太原新寺是次耕以此年客太原周假書顧校書潘代作書序皆一時事也

十月交城令趙恆夫天羽邀與華亭陸集生慶臻上海蔡竹濤

湘翦燭賦詩

元譜謙案恆夫名天羽號吉士休寧人人籍錢唐順治辛卯舉人由知縣內陞戶科給事中降補國子監學正著有續表忠記音韻正譌寄園寄所寄萬壽閣全集集生名慶臻金山衛人崇禎壬午舉人順治八年揀選推官不赴游

秦晉間晚始歸里著薺庵詩稿貧甚不克葬其親泣曰得墓田一笏營葬足矣故又號笏田竹濤名湘竹坨阮亭均與倡和後客死交城



是年詩有寄張文學昭時淮上有築隄之役一首。元譜案是年奏於淮揚界築翟家壩至十八年七月藏功山陽寶應高郵江都四州縣河西諸湖涸出者招民佃之。雙鴈

一首夏日二首秋風行一首靜樂一首寄王高士錫闡一首。錫闡字寅旭一字昭冥號餘不亦號曉庵又號天同一生吳江人精於曆算著有大曆統西曆啓蒙

丁未曆稿推步交食測日小記三晨暑志圖解曉庵新法曆說曆策左右旋問答諸書 穆案廣師云學究天人確乎不拔吾不如王寅旭 又案廣師所列不如之人十而見於詩文集者九獨與吳任臣交游之蹟無可攷見附識於此廣師云博聞強記羣

書之府吾不如吳任臣任臣字志伊一字爾器浙江仁和廩生福建莆田人已未試鴻博二等授檢討著有周禮大義禮通十國春秋山海經廣注等書魏冰叔稱當世著作有不可少之書三十國春秋其一也王倬今世說云吳志伊志行端慤博學深思兼

精天官奇王之術又精樂律嘗於市上見編鐘一枚曰此大呂鐘也後濼視款識果然 孟縣北藏山一首。

十一年壬子六十歲。

由山西至京主公肅甥從兄平庵甥徐履忱來省。元譜平庵名孝宏以貢選泰興縣訓導即武孝廉爾策之父

五月至濟南 八月入

都仍主公肅甥 十月往德州。元譜先生手蹟云舍甥久積傾慕昨奉叩未晤今擬於初四日扳駕一談俾弟亦得侍聆

誨言至感至感弟在初旬內亦欲出都矣又一通云五日前曾走叩未晤既台命諄諄不敢

固強舍甥容另卜日奉候但弟日下即擬出都不得追陪一敘奈何奈何尚容趨別未悉又一通云前走叩未得而弟以十二三

出都往德州此刻擬一造別并問貴鄉有旅伴可同行否退谷先生常問起居附及穆案此三札以元譜推尋情事當在是時 由

河南至山西。元譜與閻百詩若璩相遇於太原 徐譜案尚書古文疏證有壬子冬客太原與顧甯人論朱謀瑋水經注箋事

穆案潛研堂集閻先生傳康熙元年始游京師旋改歸太原故籍為諸生

祭酒顧先生炎武游太原。以所撰日知錄相質。即爲改訂數條。顧虛心從之。又潛邱劄記。有與先生論幽并營。在禹貢九州外一條。云。余時同客太原。面質正云云。又曰。吾與君所共游者。非石嶺關以南乎。潛邱生於崇禎九年丙子。少先生二十三歲。松案。潛邱補正日知錄。凡四十一條。復糾肇域志。言晉穆侯。晉境不得至界休之非。又言代四遷。不止於三。江西三。僅知其二。說具載所著劄記中。然與劉超宗書。言先生之書。精且博。與戴唐器書。言讀顧氏音學五書。心花怒生。背汗浹出。又言此地縉紳。有如馬宛斯其人者。文學中有如傅青主。顧甯人其人者。使後生小子。感奮興起。紹明古學。直追金華嘉定諸先生之遺風。其服膺先生至矣。

度歲於靜樂。

衷和敏德來學。

元譜所載。未詳其人。

寓書潘次耕。

議撫吳江族子衍生爲嗣。

是年。從子洪善。鄉試中式舉人。元譜

原一主順天鄉試。

韓元少出其門。

有撫其取副

榜不及漢軍者。坐降級歸。

穆據有懷堂集補。

潘稼堂贈先生六十壽序云。吾師亭林先生。負名世之資。學貫天人。而遭罹厄會。崎嶇戎馬之間。顛沛岸獄之下。瀕危者數矣。卒自全。客游二十歲。窮邊絕塞。靡險不經。而筋力不息。今六十矣。精明彊固。無

減壯年。徐譜。

是年詩。有讀李處士襄城紀事一首。寄楊高士瑀一首。

謙案。瑀字雪臣。武進人。著有飛樓集。一百二十卷。年七十餘卒。穆案。廣師云。讀書爲己。探頤洞微。吾不如楊雪臣。

健庵雪臣七十壽序。先生少日。好立奇節。既而厚自刻厲。率諸子鍵戶讀書。自經史而外。分授天官地理。曆律兵農之書。出則與憚遜初講學南田。及東林書院。如是者三十餘年。

齊祭器行一首。題李先生矩亭

一 首。謙察惠太史周惕李君墓表君諱源字江餘一字星來德州人順治丙戌進士授河津令有能稱罷歸爲人和易恬退好讀書至老不倦於古今河渠漕屯兵農諸事討論尤精云云濟南府志稱源歸里後築退庵因以自號植花竹購圖書崑山顧

處士炎武聞源談易數歎曰今之管輅也

穆瓠一首土門旅宿一首

案此卽先生戊申赴東手蹟所謂北李家也

謙察先生是年有與李武曾書云弟夏五出都仲秋復入年來蹤跡大抵在此將讀退谷先生之藏書如好音見惠亦復易達頃者日知錄已刻成樣本特寄上一部天末萬山中冀冀此如靚面也率爾不宣據手書墨蹟補入

穆案望雲樓帖又載與潘次耕手札云昨退翁見召午後趨往而太史公已行不得一晤幸致意明日有便酌可於晡時過我後遣騎送回此啓次耕賢弟炎武頓首以時攷之當在此年八月復入都門時也又案周令樹重建晉祠碑亭記末云時同游

者有炎武之弟子吳江潘耒記作於此年端午後三日意次耕由太原入都冬乃南歸也故有與謙立族子衍生之書

十二年癸丑六十一歲

正月由靜樂南歸至揚州

元譜作由山西之山東據手札正說見後

入都主公肅甥

四月至德州訂州志

返章邱桑家莊八

月游濟南

元譜

寓通志局

穆據居易錄及手蹟補

居易錄山東通志修於癸丑當事既視爲具文秉筆者又鹵莽滅裂不諳掌故人物一門竟將曹縣李襄敏秉單縣秦襄毅紘沂州王恭簡景三鉅公姓名事實削去不存一字其

餘可概見矣時方伯施泰瞻天齋主其事聘吳郡顧炎武在局而不一是正可惜也先生有與顏修來手札云弟今年寓跡半在歷

下半在章邱而修志之局郡邑之書頗備弟得藉以自成其山東肇域記若貴省之志山川古跡稍爲刪改其餘概未經目雖抱素餐

之譏幸無芸人之病然以視令叔先生則眞魯之兩生不敢望後塵矣汝陽歸我治之四年始得皆爲良田今將覓主售之然後束書

西行爲入山讀書之計所刻座右銘一通並音學五書面葉呈效近日又成日知錄八卷章布之士僅能立言惟達而在上者爲之推

廣其教於人心世道不無小補也。率此附候不宜。穆案通志之役張稷若亦在局中見所作李織齋文鈔序李織齋者即先生謫軀十事所云樂安李象先也。

十月自章邱至德州哭程正夫工部。

又聞從叔父穆庵及歸元恭訃設祭於桑家莊。

入都得滇南報。

元譜是年朝議撤三藩兵衛。

寄潘次耕書令族子

衍北上。

在京度歲。元譜

是年次甥秉義登進士一甲三名。

穆補韓英榜英字元少號慕廬長洲人。

是年詩有贈錢編修秉鐙一首。

元譜秉鐙字幼光後改名澄之字飲光宏光時客嘉善錢吏部仲馭家馬阮方興大獄逮捕諸清流飲光名亦在捕中乃變姓名逸去南都失守飲光走粵東妻孥盡死於震澤乃

爲僧裝釋名西頌七年後始返故里編修蓋唐藩遙授者。

穆案譜謂編修爲唐王遙授大謾穆嘗鈔得飲光所撰明末野史其

永歷紀事篇載云永歷三年十二月二十四日上臨軒親試經義三道論一道詩一首取中八人授翰林院庶吉士秉鐙名在弟

二又一條云庚寅冬蒙臨軒特典改授庶吉士予出山陰嚴公起恆門公在上前極稱予有制誥才請改編修管制誥上頷之然則飲光乃桂王間關從龍之彥矣故先生詩曰斷煙愁竹泣蒼梧秃筆悽文來漲海也。松案飲光於壬子冬入都館龔尙書鼎

孳家見憺園集。

謙案飲光嘗問易於漳浦黃先生撰田間詩學以小序首句爲主采諸儒論說自注疏集傳外凡二十家於名物訓詁山川地理言之尤詳詩得香山劍南之神有藏山閣稿田間集。

先妣忌日一

首自章邱回至德州則程工部逝已三日矣一首有歎一首哭歸高士四首。

穆案微雲堂雜記顧甯人與吾友歸元恭同里閉元恭守

鄉曲而甯人出游四方所至墾田自給元恭嘗邀同社諸君子會於影園余以病不果往元恭旋歿余以詩哭之又爲文祭之曰先王道喪士習懦懷孔子有言必也狂獷歸奇顧怪（四字出於此）一時之選漁獵子史貫穿經傳志高氣盛雄傑魁岸顧游

四方燕塞秦甸。君獨閉門。枯守筆硯。砥馳不羈。俗人笑。冊抱太僕文。蒐羅拾擲。胡忽隕亡。逝如飛電。

有從叔父穆庵府君行狀。

是年先生有答李武曾書云。黔中數千里所刻之書。并十行之贖。乃不久而達。又得手報。至方山所。而寄我於樓煩鴈門之間。若類陽至近。天生至密。而遠客三楚。此時猶未見弟之成書也。穆案受祺堂集。子德於壬子癸丑兩年。俱在湖北。癸丑夏。有得甯人先生書。感賦一首。人事之不齊。有如此者。可爲喟然一歎。此書中有二條。未得高明駁正。輒乃自行簡舉。容改後再呈。且續錄。又得六卷。未必來者之不勝於今日也。交城縣刻弟所正之七經誤字。附上一紙。比客維揚。頗能攝疾。遠承注問。并謝附李來書云。客春黔陽一緘。奉候。想入記室。自後驅車關塞。不覺踰年。朔氣愁人。每憶江鄉景物。恨不能奮飛。與先生共話鶯黃柳碧間也。邇來道體何似。肺病想不復作。甚念之。弟新正入都。爲諸公所留。遂下司勳之榻。屈指邗江繫纜。又在來春。爲耿耿耳。所攜台札。一一致到。阮亭匆匆。屬筆前。貽錫嚶物。面致久矣。君館於東撫君。甚善也。好風南來。時惠遠音。以慰翹切。謙案武曾秋錦山房集序。辛亥春。從曹澹餘侍郎入黔。朱竹垞江湖載酒集。亦有寄武曾在貴竹金縷曲詞。中有上巳浮杯匆匆別句。則武曾之往貴州。是辛亥三月。茲書首云。客春黔陽一札。當指到黔之次年壬子。而此書之發。蓋在癸丑歲也。兼得兩先生手翰。故於今年並補錄之。第以是年朱李兩家蹤跡。就竹垞年譜證之。與李書所云。多不相符。而元譜於先生今年。亦未有揚州養疴之事。其中如何舛迕。未敢臆斷。存之以俟續攷。穆案據元譜。辛亥十月。在交城令所。此云交城縣所刻七經誤字。知必在辛亥之後。據此年寄修來札云。又成日知錄八卷。此云續錄。又得六卷。知必在此年之前。先生上年於靜樂度歲。故云寄我於樓煩鴈門之間。比客維揚。則作復書之地也。然則此札。必在癸丑春首。竟由靜樂南征。元譜誤云之山東耳。若良年一札。則與先生書前後俱不相應。知者先生既以著書相寄。不容更無一語相復。又漁洋以壬子夏典試四川。差旋遂奉母夫人諱。家居。此有阮亭匆匆屬筆之語。札必不作於癸丑。更無疑也。此札或前或後。不敢遽定。然考健庵李分虎詩集序曰。長水李斯年。武曾分虎三兄弟。俱淵雅負雋才。俱好遠游。六七年前。斯年游粵東。武曾游黔中。而分虎尤越在萬里外。在五溪六詔間。既念家有老母。日南天末。不可以久居。則

由金齒歷貴筑。從其仲兄武曾。開關跋涉。以歸。蓋歸甫踰時。而西南之變作。攷吳逆以十三年正月反。而先生丙辰冬。有與分虎詩曰。李生符自南中歸。橋李三年矣。則武曾之歸。當在此年冬盡。札首又有此後驅車關塞。不覺踰年。朔氣愁人云云。似是自黔歸後。又作西北之游。意此札亦當在乙卯丙辰間也。車君因先生書有比客維揚語。李書有邗江繫纜語。遂誤仍爲來書耳。曹澹餘侍郎者。安邱曹申吉也。康熙十年。由兵部侍郎。授貴州巡撫。吳三桂反。申吉從賊。後不知所終。或云三桂疑而磔之矣。又案。頃借得良年秋錦山房集。其子潮借跋云。是編卽以行止出處爲卷次。蓋仍然編年也。癸丑歲。九友詩。其弟二首。爲懷崑山顧甯人炎武。尾句云。昨者日知錄。寄我楚南峯。確係壽壬子也。春杪。有聞斯年兄從嶺南歸。營草堂於長水東村。相見當在今臘詩。又。二月中得分虎自滇中寄詩有云。約束琴書好歸去。莫令又過菊花時。歸途與分虎舟中夜坐共話家園詩。有云。武陵烟霞照江底。人家茅屋秋雲裏。則於晚秋道出湖南也。此年蹤跡合之。健庵詩序。無不一一符合。次年甲寅家居。有家讖及同人游宴諸作。次年乙卯。歷游邗上。滁州。懷遠。龍山諸處。所謂自後驅車關塞。不覺踰年也。此後或家居。或暫出游。以未遠涉。故詩亦不詳。其借健庵宮坊集。錢遵王述古堂及立齋園居落成招飲諸作。則丁巳後徐氏兄弟居憂時事。然則此札必在戊午應詔北上後無疑。時漁洋已服闋。改官翰林。竹垞亦被薦入都。與札中云云。又一一符合也。据知客春云者。特回憶往事。非孤指作札之前一年。而先生之札。及貽竹垞物。何由得良年攜來。此間情事。則不可臆推矣。良年初襲虞姓名兆潢。又名法遠。後復姓名李良年。字武曾。號秋錦。嘉興人。生於崇禎六年癸酉。少先生二十歲。

### 十三年甲寅六十二歲

正月出京。由易州往汾州。四月至德州。回濟南。度歲於桑家莊。

元譜

是年詩。有廣昌道中二首。寄問傅處士土堂山中一首。與胡處士庭訪北齊碑一首。

元譜。謙案。庭。字季子。汾陽人。青主弟。

子。穆桑戴東原修汾州志。庭父名遇春。崇禎戊辰進士。由聊城知縣。擢戶部主事。庭自李自成之亂。遂與弟同。並隱居講學。庭於易詩春秋論語大學孟子皆有論著。又曰顧炎武。其學上繼漢唐。攷核之儒。其金石文字記。所載大相里齊天保三年。相里寺碑。郭社村。唐乾封二年。郭君碑文。侯村。唐上元三年。任君碑。小相里。唐相里瑞碑。晉天福五年。相里金碑。皆身至其地。摹拓者。詠史二首。路光祿書來。敍江東同好諸友一時徂

謝一首。過矩亭一首。潘次耕南歸寄示一首。子房一首。劉禾長白山下一首。歲暮一首。

十四年乙卯六十三歲。

從子洪善來省於章邱。赴濟陽訪張稷若。往德州。送程工部葬。八月。自山東歷河南。抵山西之

祁縣。主戴楓仲廷杖家。元譜。楓仲名延杖。祁縣人。家多藏書。及法書名畫。著有半可集。與傅青主。王漁洋友善。謙案。竹南漫錄。楓仲博學好古。所居丹楓閣上。圖書鼎彝羅列左右。人方之倪迂清閨。楓仲為築

室祁之南山。穆據受祺堂集。答戴楓仲見懷詩注補。詩云。漢室開遺老。君為築草亭。自注。顧亭林將起山堂。祁之南山。戴力任之。先生因之置書堂焉。穆據。蒿庵集。及竹垞詩話補。蒿庵自敘墓志。所著有儀禮鄭

注句讀。遇崑山顧甯人錄一本。藏山西祁縣所立書堂。靜志居詩話甯人於山西營書院一區。盡取家中所藏十四經。二十一史。暨明累朝實錄。插籤於架。予嘗分書題其柱云。入則孝。出則弟。守先王之道。以待後學。誦其詩。讀其書。友天下之士。尚論古人。穆案。先生又嘗欲作書堂於西河之介休。聚天下之書。藏之以貽後之學者。見健庵兄弟徵書啓。

十月六日。張帝臣某及張又南雲翼過訪。元譜。帝臣無攷。又南。名雲翼。咸寧人。靖逆侯甘肅提督勇之長

子。以父廕。官大理寺卿。是年春。平涼王輔臣反。三月。輔臣函大將軍符。割招勇。勇斬其使。命長子雲翼赴京。首奏。勇得管侯爵。閏五月。大破賊於鞏昌。收復寧州等衛之陷賊者。亂遂平。勇喜與賢士大夫延接。同里若李中浮。王山史。李子德。咸與之為忘分交。謙案。先生

著左傳杜解補正三卷。又南捐賞刻之。穆案衍生書  
寫歷代宅京記一部。贈靖逆侯。其時又南已襲爵矣。

納妾於靜樂。

元譜先生辛亥在太原遇傅青主診  
先生脈云尙可得子。至是因納妾。

是年公肅改

翰林院學士原一復元官。

穆補。彥和。  
時官中允。

是年詩有兄子洪善北來言及近年吳中有開松江之役一首。

元譜案康熙十年二月江蘇巡撫馬祐奏潘劉  
家河五千一百八十丈十二月委蘇松常道參

議韓佐周及蘇松二府同知通判師佐王永熙周祚昌等董潘吳淞江一萬四百九十一丈各於海口置閘其經費則奏准留蘇  
松常三府漕折銀九萬兩浙省杭嘉湖三府漕折銀五萬兩充費同藩司慕天顏檄行所屬督理是年九月崑山知縣董正位申  
詳開潘瓦浦凡三十六里是月興工至十二年五月訖工邑諸生朱青以歲旱請於巡撫浚注浦自刁家橋東出吳淞民賴  
其利改注浦曰朱浦詩中有云那聞父老復愁兵秦關楚塞方酣戰者是歲以耿吳二逆之故天下騷然所在多不靖云

閏五

月十日二首過張貢士爾岐一首送程工部葬一首寄路舍人一首孫徵君葬於夏峯時僑寓太原  
不獲執紼一首。

元譜案李徵君年譜乙卯冬顧甯人書來甯人自癸卯盪屋別後雖足迹遍天下而音問時寄是時徵君流寓富平寄書略云先  
生龍德而隱確乎不拔真吾道所倚爲長城同人所望爲山斗者也今講學之士其篤信而深造者推先生異日九疇之訪丹書  
之受必有可以贊後王而啓來學者側聞卜築平  
陽管幼安復見於茲弟將策蹇渭上一敘渴棕也

是年撰陳鼎和墓志。



十五年丙辰六十四歲

正月自山西之山東二月入都主原一甥

元譜 穆案原一時官右贊善餘集有與潘次耕札云原一官彌貴客綱多便佞者留剛方者去今且欲延一二學問之士以蓋其羣醜吾以六十

四之舅氏主於其家見彼蠅趨蟻附之流駭人耳目至於微色發聲而拒之乃僅得自免

三月回山東五月入都二十八日先生誕辰原一具酒稱祝

秋至薊州仍入都十一月二十四日先生弟五妹徐太夫人訃到二十七日成服越二日設奠命

撫子衍生北上並寓書湖州沈允斌三會沈度汪涵昆季附其家眷舟至京

元譜 謙案沈度汪名涵一字心齋歸安人康熙丙辰進士官至閣

學一統志稱其督學福建時試士公明雖助貴請托弗許所拔皆名宿以朱子分年讀書法課士士習爲之不變秩滿去閩人創清茗書院祀之允斌未攷 穆案康熙丙辰進士履歷便覽沈三會允斌丙午年生歸安籍烏程人壬子十二名會試三十六名二甲二名欽選清書庶吉士戊午授編修沈涵度汪丁酉年生歸安人乙卯五名會試十七名二甲三名欽選清書庶吉士戊午授編修三代同輩胞兄弟也以生年核之度汪是年二十歲允斌若生於丙午纔十一歲耳丙子殆甲子之誤是時年二十三也然試年多不足據如下顧洪善生於崇禎壬午而履歷作戊子則減六歲也

又案康熙十八年己未會試允斌度汪皆充同考

在京度歲

是年從子洪善成進士

元譜

改中書

穆補康熙丙辰進士履歷

便覽顧洪善字達夫戊子年正月十六日生崑山人壬子十四名舉人會試十二名二甲十六名 先生有手札云歲云莫矣欲走齋中一晤不知可得片刻之暇商訂風雅否此問殊覺總總弟於二十七日移至舍姪寓中度節肇城記想已閱畢幸付下此啓以元譜攷之知必在是時蓋因徐氏居憂故

從子洪慎得子於崑命名世樞字之曰榮緒後更名宏佐字復呂立爲孺

於成服之日即移至達夫寓中也

# 子詒穀後

元譜崑新合志宏佐年十三補松江府庠生長洲何焯跋其文勉以繩武年未二十病療卒健庵立孫議男氏亭林先生立從子洪慎之子世樞爲孫或者曰無子而立孫非昭穆之序是使世樞有祖而無嗣也先生卽有子而殤殤不立後盍擇諸族兄弟之子以爲嗣乎予應之曰不然自夫子之告子游已謂三代以後天下爲家各親其親各子其子爲人之同情是則兄弟之子必親於從兄弟之子從兄弟之子必親於族兄弟之子也明矣古人之立宗也自非大宗五世親盡則族屬絕苟謂兄弟之子無當立者舍兄弟之孫弗立而立疏遠族屬之子爲嗣其於祖若考之意果無憾乎有國者之繼世與士大夫之承家其理則一而已矣吾外家顧氏侍郎公有二子贊善公爲大宗夢庵公繼嗣之宗也夢庵公有子未昏而夭貞孝王孺人服喪衰以歸於顧又十二年先生方在襁褓夢庵公撫而立之爲貞孝後先生實吾外祖寶瑤公之子於寶瑤公之子孫爲至親寶瑤公諸孫洪善家適也洪泰孤子不得爲人後吾仲舅子嚴失明年老唯洪慎一子非支子不得爲人後洪慎生三子矣立世樞爲先生後不亦可乎晉書荀顛傳顛無子以從孫徽嗣中興初以顛兄元孫序爲顛後封臨淮公荀氏潁川名族子姓甚繁豈無昭穆之倫可立爲子者而獨以從孫嗣其必不舍親屬而他立也禮之權而不失經者也何琦之從父以孫紹族祖琦以爲宗緒不絕若昆弟以孫若曾孫後之理宜然也禮緣事而興不必拘常以爲礙也故雷次宗釋儀禮爲人後者之文以爲不言所後之父者或後祖父或後高曾凡諸所後皆備於其中庾純云爲人後者三年或爲子或爲孫若荀太尉養兄孫以爲孫是小記所謂爲祖後者也祖所養孫猶子而孫奉祖猶父無改父祖之差同三年也何琦庾純古所稱知禮之君子其言鑿鑿如此惟庾蔚之謂間代取嗣古未之聞然試以各親其親之常情準之則必喟然發寤以爲不悖於先王之道矣故昭穆相繼其常也如親屬無當立者不得已而立從孫爲孫如父子之誼仍不改其昭穆之倫毋亦勢之不得不然而聖人之所許與予故詳論之以告吾母黨云甥徐乾學謹議謙案先生與李霖瞻書猶子衍生稍知禮法不好嬉戲竟立以爲子而崑山從弟子嚴連得二孫又令荆妻抱其一以爲殤兒之後云云所抱者卽洪慎之子宏佐本先生立爲殤子詒穀之後先生之治命也而衍生立爲子亦先生初意且相隨五六年並爲之授室以至於視含飯恩義亦非泛常乃稽其家譜立爲先生後者別名洪瑞又不詳洪瑞之所出豈先生既歿家人乃斥退衍生復爲立洪瑞耶抑洪瑞卽衍生之改名邪均不可

攷矣。穆案洪瑞蓋衍生之譜名。歷代宅京記。後有衍生跋云。先府君著書俱有自序。茲編告成最晚。甫脫稿。府君捐館。徐相國遣人取去。自念雲泥勢阻。無能往索。至相國歸田後。始獲檢還。不肖衍生泣血誌案。立齋以康熙二十九年九月致仕歸里。距先生之歿已九年。又元和顧廣圻家藏先生著書目錄。衍生手蹟也。跋云。歲丙子。不肖衍生於舊篋中。檢得此本。讀之泫然。因追想當年。多所不符。丁亥冬。於宛陵旅舍出而錄之云云。丙子爲康熙三十五年。丁亥爲康熙四十六年。距先生之歿二十六年矣。康熙壬戌。衍生年十七。至康熙丁亥。衍生年四十有三矣。抱業稱孤。曾無異說。豈有家人斥退之理。得此二證。車君之疑可渙然釋矣。

是年詩有漢三君詩三首。楚僧元瑛談湖南三十年來事。作四絕句四首。簷下雀一首。元譜。蓋居徐氏寓邸時作。 薊

門送子德歸關中一首。徐譜。子德。蓋自先生詩獄事畢至此年重至京師。 寄李生符一首。徐譜。符。字分。虎良年之弟。

作日知錄自序與戴耘野書。徐譜。戴笠。初名鼎立。字則之。更名笠。字耘野。又字曼公。吳江人。潘稼堂之師。

先生是年有與黃太沖書云。辛丑之歲。一至武林。便思東渡娥江。謁先生之杖履。而逡巡未果。及至北方。十有五載。流覽山川。周行邊塞。粗得古人之陳迹。而離羣索居。幾同僧父。年逾六十。迄無所成。如何如何。伏念炎武自中年以前。不過從諸文士之後。注蟲魚。吟風月而已。積以歲月。窮探古今。然後知後海先河。爲山履簣。而於聖賢六經之指。國家治亂之原。生民根本之計。漸有所窺。未得就正有道。頃過薊門。見貴門人陳萬兩君。具論起居無恙。因出大著待訪錄。讀之再三。於是知天下之未嘗無人。百王之敝。可以復起。而三代之盛。可以徐還也。天下之事。有其識者。未必遭其時。而當其時者。或無其識。古之君子。所以著書待後。有王者起。得而師之。然而易窮則變。變則通通則久。聖人復起。不易吾言。可預信於今日也。炎武以管見爲日知錄一書。竊自幸其中

所論同於先生者十之六七。但鄙著恆自改竄未刻。其已刻八卷及錢糧論二篇。乃數年前筆也。先附呈大教。倘辱收諸同志之末。賜以抨彈。不厭往復。以開末學之愚。以貽後人。以幸萬世。長任禱切。謙案。此書不載集中。茲從黎洲所著思舊錄中補入。穆案。黎洲生於萬曆三十八年庚戌。長先生三歲。陳萬兩君者。陳介眉。錫綬。定海人。以是年成進士。入翰林。萬謂季野先生。時客健庵。尙書家。又車君於辛丑下案云。先生丙辰歲與黃太沖書。是年曾至武林。並未渡江。而元譜乃謂抵紹興。謁禹陵。未知何據。然先生實有謁禹陵。宋六陵諸詩。又似親履其地者。不敢強解。闕疑可也。許瀚案。娥江在紹興東嶧縣。未渡娥江。非未渡錢塘江。固無害其抵紹興謁禹陵也。此言一至武林者。猶言一至浙江耳。卽東至紹興仍可說一至武林也。

十六年丁巳六十五歲。

正月與甥原一彥和公肅話別於天甯寺。

元譜 穆案 寺在廣甯門外。

二月至昌平六謁天壽山及懷宗櫓宮。是行

也與王山史偕。四月出都十三日至德州見撫子衍生成及衍生之師李旣足雲霑於張簡可家。

元譜 先三

日衍生成及師李旣足附沈度汪家眷至德州將入都先生預留書張簡可家止之至是相見行父子禮。謙案張簡可未攷。穆案自此以下皆衍生成所親見故記述頗詳。

訪李霖瞻浹李星來源。

元譜霖瞻名浹號陶庵德

州人順治丙戌進士延慶知州芮城知縣潘次耕陶庵詩序先生雅慕靖節爲人築一室曰陶庵日哦其中。

是月二十一日自德州至鄭家口二十四日抵曲周主路安

卿家祀先於旅寓。五月七日移寓曲周之增福廟。

元譜主僧名晏如時當塗令賀宣三應旌亦寓廟中。

延旣足暫留課子卽去之山

西道汾州之介休霍州之靈石。九月入陝主王山史家。

穆補訂 王山史山志丁巳秋九月初三日亭林入關主於予家將同作買山之計類陽郭九芝明府聞之以書來

曰聞顧甯人先生已抵山居甯人命世宿儒道駕嚴然非無所期而至止關學不振已久斯其為大興之日邪予復之曰弟年近五十始歸正學今幸甯人先生不棄正欲策厲驚鈍收效桑榆云云受祺堂集有承問甯人先生中秋抵華下阻雨尚稽省視悵然有作四首又詣華陰時甯人先生未至一宿而行二首元譜記先生冬入陝十一月始訪山史於華陰以王李所記核之知譜誤也蓋衍生雖南來尚留德州未隨行故所記稍差耳訪李中孚於富平東南軍崇之北

元譜李徵君年譜甯人自山右來訪密邇徵君時至臥室盤桓語必達旦案徵君年譜系此則於丙辰冬致衍生元譜丙辰年未嘗入秦甚至富平實系丁巳當時衍生已隨侍往來應無誤記李譜或偶譌耳李子德來迎因過所

居月明山下登堂拜母徐譜山在富平縣東北七十五里子德居於山下十一月游太華重訪山史於華陰穆案受祺堂集邑里絕句詩注類山亦名月明山

復回山西度歲於太原之祁縣是歲從子洪慎舉次子先生名之曰世棠字曰思召元譜此下曰即寄書從弟子嚴欲立世樞

為孺子詒穀後並屬達夫致詞謙案崑新合志世棠以諸生入太學喜蒐羅先世手澤以長子炯詩為宏佐後構遺清堂貯從祖炎武遺書俾世守焉嫁妾於李又泉元譜先生規友人書云於靜樂買一

買之妾乃祁縣人邪日知錄月食條下有云靜樂李鱸習西洋之學疑又泉即鱸之字矣

是年詩有有事於橫宮一首贈賈太監宗一首陵下人言上年冬祭時有聲自寶城出一首郭林宗

墓一首介休一首介之推祠一首霍北道中懷關西諸君一首河上一首案丙辰年叛將王輔臣踞陝西之龍駒砦斷商維南路旋復引川寇

犯通渭是年輔臣為大將軍圖海所敗朝命招撫乃率衆降而賊黨吳之茂寇秦州十二月朝命建輝將軍吳丹略地華商副都統佟舒運敗賊於峻嶺復山陽縣故詩有去年方鬪爭掘濠守朝那云雨中至華下宿王山

史家一首。過李子德四首。

徐譜案。鶴徵錄云。天生與亭林竹垞暨李良年爲布衣兄弟。天生年小於顧。而長於良年二歲。雖在客所及私寓。無或亂者。故詩云。及門初拜母。讓齒忝爲兄。穆案。受祺堂集。有甯人先生

肯訪山村留宿見贈四詩。用韻奉答四首。

阜帽一首。采芝一首。寄李生雲霑一首。

有答曾庭聞書。

元譜。庭聞名晚。初名傳燈。寧都舉人。弟名傳燦。字青藜。皆駿雄自命。有雙丁之目。

作華陰王氏宗祠記。

十七年。六十六歲。

春。由太原入關中。富平令郭九芝傳芳。

元譜。大同人。授咸寧縣佐。攝邵陽長安篆。俱有聲。遷富平知縣。瀆逆之變。涼寇竊發。傳芳偵賊

穆案。陝西通志。令長名宦。郭傳芳。字九芝。大同威遠衛人。由選貢

將入境。乘霧搗巢。斬獲有功。時軍書旁午。傳芳轉輸有法。民不告勞。又受祺堂集。與九芝詩至多。九芝一字獻素。明年升任達州。

迎先生於二十里外。

元譜。穆案。餘集。先生有與潘次耕書。曰。潁陽令郭公既迎中孚。而僑居其邑。

今復遣人千里來迎。可稱重道之風。而天生遂欲爲我買田結婚之計。雖未可必。然中心願之矣。又受祺堂集。有陳情歸賦雲。中曲呈郭明府詩曰。晨起呼童秣吾馬。爲公親介初度鴈。前年是日杯相屬。左有東吳右二曲。自注。謂甯人先生中孚家兄。正此年秋事。又云。今此二妙跡稍遠。太原徵君聲光續。自注。時迎青主傳先生至案。明年先生出游。嵩少冬仲始旋關中。故云跡稍遠。而九芝又迎青主入關。信乎好賢之篤矣。

閏三月。遣子德家人。至曲周接衍生及

既足。期會於富平軍。柴李中孚家。四月朔。九芝邀先生至署。寓南庵。旋移寓朱公子樹滋齋中。

元譜。樹滋

字長源。故宣府巡撫都御史。與既足次弟故友遺詩。

元譜。穆案。尙書古文疏證卷八。余戊午。應薦至京師。崑山顧炎武甯人。時在富平。有自富平來。傳其新論者云云。

字長源。故宣府巡撫都御史。與既足次弟故友遺詩。

時朝議以纂修明史特開博學宏儒科徵舉海內名儒官為資送以是年冬齊集都門候試先生同邑

葉訥庵閣學及長洲韓慕廬侍講欲以先生名應薦已而知先生志不可屈乃已於是先生絕迹不至

都中。元譜。穆案。已未詞科錄。賈崧按。葉訥庵侍郎。欲舉亭林。亭林固辭。致書者三。遂不列薦劄。常熱矣。龍錫有詩云。終南山下草連天。神放猶慚古史箋。到底不曾書鶴板。江南惟有顧圭年。

冬張又南廷尉承父命來聘往蘭州堅辭之。元譜。張靖逆時提督蘭州。潼商道胡狷庵戴仁來訪欲聘至署亦辭不

往。元譜。何狷庵未詳。穆案。何乃胡謫。陝西通志。分巡潼商道。有胡戴仁。北直容城人。康熙十四年以參議任。過同州之華陰達華州止吏目王二華爾謙署。元譜。爾謙常熟人。

是年詩有春雨一首寄同時二三處士被薦者一首井中心史歌一首夏日一首。元譜。時秦隴苦旱。梓潼篇一

首和王山史燕中對菊一首關中雜詩五首過朝邑王處士建常一首。元譜。建常字仲復。邠州長武人。居河渭之間。早棄帖括。以著述自娛。著有

律呂圖 說二卷

有答潘次耕書與李湘北書。元譜。湘北名天額。合肥籍。永城人。順治戊戌進士。官至大學士。謚文定。著有容齋集。徐譜。湘北時官內閣學士。子德之舉鴻博。是湘北所薦。故先生為子德致書。與李星

來書答李紫瀾書與友人辭往教書答李子德書與友人書

# 顧亭林先生年譜卷四

十八年己未六十七歲。

正月往延安抵同官縣拜寇公墓。

元譜。穆案寇公名愷字永修同官人墓在縣東南義興原餘集有寇公墓志曰天啟六年寇公爲蘇州知府炎武年十四以童子試見公被一言之獎於今五十有四年而始得

至同官拜

公於墓下旋攜衍生移寓華下山史所構新齋。

元譜案先生關中雜詩第五首自注云山史新構小齋將延余住又元譜是年二月攜衍生往華陰主王山史家而先生與從子書則謂新正已

移至華下據正穆案受祺堂集有題無異先生顧廬三首序曰無異先生初輯是廬學易其中因以顏之顧亭林先生至華下借居之亭林先生既歿山翁改署今名李生見而哀之且多山翁之敦夙好也爲詩紀寔云爾然則所構新齋卽山史之讀易廬矣。

先是山史以朱子於淳熙乙巳寄祿華州雲臺觀欲爲建祠堂兼營書院以居先生因遷入山史家。元譜

先生與從子書云新正已移至華下祠堂書院之事雖皆秦人爲之然吾亦須自買堡中書室一所水田四五十畝爲饗煖之計秦人慕經學重處士持清議寔與他曾不同華陰縮穀關河之口一旦有警入山守險不過十里之遙若志在四方則一出關門亦有建瓴之勢餘集有與潘次耕札曰朱子祠堂山史但能割地耳經營之事吾將一身任之穆案祠堂於辛酉夏始落成書院則當因山史南游故未竟其業故先生與李中孚書曰不欲再起書院蓋不欲借祠堂之名自營菟裘也受祺堂集有奉先生詩曰曾論徹祀虛籩豆許傍新宮自築堂自注先生有約居雲臺觀朱子祠內徐譜是年李子德自京師還潘稼堂贈詩有云吾師顧亭林名德今第一停車華山陽與君等膠漆又云吾師築書堂髣髴近箭栝雲臺紫陽祠氣象甚宏豁見君樂難支管席諒不割謂先生在華陰時



事也。

三月出關作嵩少之游。

元譜。穆案。金石文字記。開母廟。石闕記。今在嵩山。啟母廟南。歲屠維協洽暮春。余親至廟下。視此石闕云云。又有嵩山太室神道石闕銘云。在登封縣中。岳廟南百餘步。又有少室神道石闕銘。

云在登封縣西十里邢家鋪西距少室山尚十餘里。

四月至曲周旋由河南抵汾州。

馬右實嗣光掣甘肅道欲挈姊氏赴任時右

實已患病止之弗聽。

元譜。嗣光無攷。穆案。順治丙戌進士。履歷便覽。馬嗣光。榜名剛。字右實。睢州人。工部觀政。授北直廣平知縣。丁亥調湖廣辰溪知縣。戊子本省同考。庚寅考察。己亥補江南懷寧知縣。戊申升吏部驗封司主事。

庚戌會試同考。本年升稽勳司員外郎。奉旨改名。又庚戌同考吏部驗封清吏司主事。馬剛。裕三。河南籍。山東臨朐人。又順治十八年。縉紳懷寧知縣馬剛。字胸。河南睢州人。又受祺堂集。有送馬右實吏部分巡蕭州詩。時子德應鴻博試在京師也。

長洲

毛錦銜今鳳來受業。

奠王式吾及平陽王九如。

元譜。二人俱無攷。

十一月回華陰。

十二月二十七日張又

南廷尉夜半造訪。

是年葉訥庵閣學充明史館總裁欲招先生入史局復力卻之。

元譜。

公肅甥二月

召監修明史九月赴闕。

補。

是年詩有寄子嚴一首寄次耕一首次耕書來言時貴有求觀余所著書者一首雲臺觀一首西鵝

路一首雒陽一首嵩山會善寺一首少林寺一首嵩山一首測景臺一首

謙案。潘耒游中嶽記。告城鎮。即古之陽城也。周公卜洛立表測景以

此為地中。今有測景臺存焉。臺高五丈。縱廣三丈。形體正方。而缺其北面十之二三。以懸壺滴漏當缺處。鋪平石一行於地。其長視臺之高廣可二丈許。刻水道其上。以承壺漏。視水所至。以定時。俗謂之量天尺。規制古樸。思理精微。非周公不能作。臺南一石。

高文許上立一表其長八尺是謂土圭此唐儀鳳中所立見杜氏通典

卓太傅祠一首 梁園一首 海上一首 五嶽一首 贈張力臣一首

元譜時力臣北游

子德西歸省吾於汾州天甯寺一首

穆案汾州志李因篤與崑山顧炎武太原閻若璩皆以博古精考核為學者推重其至汾陽因顧炎武游汾時取道而來也

寄次耕四首

歲暮西還時李生雲霑方讀鹽鐵論一首

作寇公墓志銘為吳江朱處士明德作廣宋遺民錄序

元譜明德字不遠隱居爛溪之濱少治經義有聲別著句吳外史編記鼎革時事甚悉

書太虛山

人象象譚後與潘次耕書與公肅甥書與葉訥庵書與史館諸君書答湯荆峴書

元譜案文正謝病里居時先生曾以書通問既

開局修明史文正分編太祖本紀四卷列傳十餘卷以書來詢答之如此謙案湯子遺書內載有答先生書一通 穆案受祺堂集有與湯荆峴詩云東吳披裘翁足跡天下徧掉臂凌遠舉惟公接游燕

與人書二十二

元譜案崇

福宮在登封縣北嵩陽書院之旁井叔氏葉名封武昌人順治丁亥進士康熙中授延平推官改知登封舉鴻博報罷入為兵馬指揮介石氏耿名介順治壬辰進士登封人康熙十八年以兵備副使家居講學時登封令為長洲張燠此書疑張於未竟工時

以書相質故答之如此其明年工竣湯文正公為作嵩陽書院記

十九年庚申六十八歲

元旦作一聯云六十年前二聖升遐之歲三千里外孤忠未死之人以明神宗光宗俱崩於萬曆庚申

也。正月。至富平。二月。先生仲姊訃至。間二日。成服設祭。三月。山西鹺使會章山寅致餽。元譜。穆案。寅。江西

清江人。康熙癸丑。翰林。

清江人。康熙癸丑。翰林。

四月。山史有諸母卒。為議服及葬祭之禮。五月。送馬右實喪出關。既足。附之南歸。二

十八日。先生誕辰。富平令郭九芝。將親來致祝。力止之。華陰令遲屏萬維城造訪。因與謀建朱子祠堂。

事。遲欣然捐俸為倡。

元譜。穆案。屏萬。又字闇生。受祺堂集有贈華陰遲明府屏萬詩云。雲臺樹接紫陽祠。適館陶潛附一枝。隔代虛傳提舉祿。新宮兼致草堂賁。正謂此事。次句自注。謂甯人先生。又寄答孟謀嶽麓詩注。朱祠倡於

遲明府。成於董明府。董號裕庵。又陝西通志。遲維城。廣寧人。康熙十九年任華陰令。歷任五載。嚴禁刁風。獎拔善類。建朱子祠堂。春秋奉祀。

遲明府。成於董明府。董號裕庵。又陝西通志。遲維城。廣寧人。康熙十九年任華陰令。歷任五載。嚴禁刁風。獎拔善類。建朱子祠堂。春秋奉祀。

十月。攜衍生往汾州之陽城里。訪前中尉朱

敏浮。

元譜。穆案。汾州志。有朱敏濠。字龍澤。慶成府鎮國將軍李自成之亂。罵賊死。敏浮當即其兄弟。行志既錄。先生詩於藝文。乃不詳敏浮出處何也。陽城里。在縣東南十里。

汾州守周西水于漆。延請

入署。

元譜。穆案。汾州志。于漆。江浦拔貢。

十一月。元配王安人卒於崑山。訃至。次日出署。十一日成服。設祭。逢七。祭奠焚

帛如常儀。度歲於王位冲德元中翰家。

元譜。穆案。汾州志。王德元。汾陽人。由貢官兵部職方司主事。

是年。公肅擢左都御史。原一以

贊善充明史館總裁。穆補。

是年詩。有送康文學乃心歸郟陽一首。

元譜。乃心。字太乙。郟陽人。漁洋奉使祭告西岳。游慈恩寺。見太乙題秦莊襄王墓絕句。亟稱之。康以此得名。學使陸儼庭。德元拔之。充貢是科。以第五人冠其

經長安語云。關中二李。友人來座中。口占二絕二首。送李生雲。霑南歸。寄戴笠。王錫闌二高士二首。訓族不如一康。著有莘野集。

子涓一首。元譜。涓字伊人。太倉人。著有水鄉集。朱處士鶴齡。寄尚書埤傳一首。元譜。鶴齡字長孺。吳江諸生。甲申後。自號愚庵。絕意仕進。專心經學。以朱子摛擊小序太過。乃集諸家說疏通。

序義。爲毛詩通義。以蔡氏釋書未精。撰尚書埤傳。以胡氏傳春秋多偏見鑿說。乃合唐宋以來諸儒之解。撰春秋集說。又以杜氏注左傳未盡合俗儒。又以林注亂之。撰讀左日鈔。自注詩文曰。愚庵小集。又注杜工部李義山詩。與先生及同里陳啟源相友善。

哭李侍御灌谿先生模一首。元譜。侍御字子木。吳縣人。天啟乙丑進士。東莞知縣。行取遷河南道御史。華下有懷。顧推官一首。華陰古蹟二首。悼

亡五首。穆案。詩有云。送汝黃泉六歲孫。謂世樞也。世樞以丙辰生。至明年送碩人葬。六歲矣。冬至。寓汾州之陽城里中尉敏浮家。祭畢而飲三首。

有音學五書後序。答王山史書。答王仲復書。穆案。王山史山志。王仲復。司寇心一公之從子也。其學一以考亭爲師。持躬處物。悉有矩矱。昔司寇爲逆黨誣害。追賊仲復先君舉囊助之。故

仲復長而家貧。遭亂棄諸生。殘迹涓濼。教授生徒。足不入城市。關西高蹈。當推獨步。庚申春。予治先君側室張氏之喪。雖其出也。微念至孝苦節。五十六年。意不忍薄。爲之加禮。繞以從事。時亭林已在予家。仲復貽書亭林。謂發乎情而不能止乎禮義。非賢者所爲。時予事已舉。未之能從。然不敢忘好友之規也。元譜。謙嘗以此事實之。李申書。太史兆洛。太史曰。王山史幼嗣叔父。其本生父母俱存。其父攜之入都。詳見山史集中。兩書未具原始。幾若山史爲撫於張氏者。如此。則有慈母如母。及庶母慈已之服。豈僅以祖免從事乎。後人有以此義駁先生者。然書稱諸母。固非慈母比也。特以少申數語。致啟羣疑耳。與友人辭祝書。與王山史書。元譜案。是時山史客游於外。先生從山右寄書。復張又南

書與毛錦銜書與公肅甥書與王虹友書

元譜虹友名懋號汲園廩監生太常時敏第七子

答公肅甥書

元譜以上三書疑皆庚申在華陰時作時三藩扇動秦隴間輓

翰旁午故於公肅

書中詳及時事

二十年辛酉六十九歲

二月望先生去汾州

元譜去汾州日別劉學使梅汾州太守周西水于漆州司馬黃伯華良驥案劉梅字訓夫故城人順治戊戌進士良驥福建龍溪生員時官汾州通判

往曲沃至解州運城

元譜穆案運城在鹽池北路邨

鹽運使黃菴園斐來會

元譜穆案斐浙江鄞縣人康熙庚戌翰林與健庵同年憺園集有送黃菴園視鹽河東詩

晦日往答即延先生入署

四月五日菴園丁內艱先生入弔畢旋出署攜衍生入關至華陰訪山史山史先於二月南游吳越

遂出菴園之餽落成朱子祠堂

七月既足自南來

八月二日自華陰俶裝至山西由運城抵曲沃

縣令熊耐徒僕聞先生至命輿至候馬驛相迎入城寓元帝廟

元譜穆案曲沃志熊僕江西新淦人進士康熙十八年任進士履歷便覽僕字匪我清江人

順治己亥進士候馬驛在縣西南三十里

十一日先生患歐瀉十八日既足得其父母凶問星夜馳歸

九月移寓上坡韓氏

鏡家十月又移寓下坡韓村韓旬公宣之宜園

元譜穆案進士履歷便覽韓宣又字裕齋康熙己未進士曲沃志韓村在縣南五里之韓河里許齊燕韓旬公傳曰吾師顧甯人先生江左

大儒千里造訪挾圖書子僕館之宜園顧歿先生視舍斂撫幼子收其四方遺寶走書告其家并維持還里穆又聞曲沃人云先生館于宜園之白石樓

望後病稍減

元譜穆案受祺堂集有亭林先生寓曲沃臥病小愈走書相問即遣使起居

奉詩  
五首。爲衍議婚。靳氏。元譜。穆案。曲沃靳氏。爲漢靳彊之裔。代  
有名人。世居縣東北二十五里之曲村。

媒四人。廣東道仇君昌祚、義學師衛處士蒿、縣

令熊君僕、貳尹徐君嘉霖。

元譜。穆案。曲沃志。昌祚。字振先。朔賢里人。初以恩貢授鄆陽通判。遷潮州府同知。將抵潮。聞總兵

屠報賊。意少解。羈賊某者。三年。潮平。得旨從優議敘。授惠潮兵備道。旋以艱歸。蒿。字匪莪。初名麟貞。字瑞鳴。以  
居母喪。易今名字。與汾陽曹良直。太原傅山友善。晚年闢絳山書院。教授其中。人稱絳山先生。嘉霖。嘉興人。

是年詩。有寄題貞孝墓後四柿一首。贈衛處士蒿一首。誦李子德一首。

穆案。誦子德詩。據子德哭先生詩注。當在明年正月易簣之日。集本於寄

題貞孝墓後四柿題下。已注云。重光作噩。此題下復注歲陽歲  
名。知是誤也。因贈毛錦銜一首。未知當在何時。故仍類次於此。贈毛錦銜一首。

有朱子祠堂上梁文。病起與薊門當事書。

二十一年壬戌七十歲。

正月四日。旬公設宴會賓友。八日。先生早起。將答賀熊令及諸官紳。上馬。失足墜地。疾作。竟日夜歐瀉  
不止。初九日丑刻。捐館。韓、熊、仇、衛、徐、郭諸君。爲經紀棺斂。并典邑人秦氏之室。停柩其中。  
元譜云。不肖衍  
生。羹羹子立侍。

奉而已。年雖十七。目未經此大事。賴韓、熊、仇、衛、徐、郭諸公。經紀  
棺槨。含斂。並典秦氏之室。停柩。而不肖廬焉。穆案。郭名未詳。

三月。先生從弟巖。自崑山來。偕衍。生扶柩歸。

元譜。  
穆案。王

山史山志。辛酉秋。予至嘉興。訪曹秋岳司農。相見。即致悼亭林之殤。爲文獻之。惜予曰。亭林無恙。尙在予家。予來時。亭林亦有山西之  
行。秋岳且驚且喜。逾年壬戌。予在海州。接閩百詩手札云。亭林於初春。劬於曲沃。予爲位而哭之。慟。秋予西歸。取道揚州。將往崑山。

過淮安見張力臣云亭林之柩尙未歸不知何以淹滯於彼深以不獲撫  
柩一哭爲憾又怪亭林未殉江南何以遠有此間擗管偶記涕下沾襟

葬於司馬賜塋東偏嗣父仲逢府君之昭位

元譜終七後不肯入關取向所寄各姓處書籍嗣大雲叔於三月望前抵曲沃簡閱遺書文稿二十四日衍從關中旋沃同居喪次所有遺書文券皆攜往都中致之健庵立齋兩表兄及汝嘉兄衍忝爲之後曾不得一寓目焉慟哉惜哉 謙案塋在崑山六保俞書浦

爲五圖鳴字圩計三

元譜 穆案此文

十八畝三分六釐

門人潘耒爲之表 遂初堂集不載

### 道光二十一年辛丑奉旨顧炎武准其入祀崑山鄉賢祠

禮部謹題爲題請入祀鄉賢事禮科抄出江蘇巡撫會同江蘇學政疏稱崑山縣先儒顧炎武砥礪廉隅匡扶名教題請

入祀鄉賢祠造具事實冊結具題請旨奉旨該部議奏欽此欽遵抄出到部臣等議得定例各省舉報名宦鄉賢該督撫學政每年八  
月前具題並將事實冊結送部詳覈於歲底彙題又崇祀名宦鄉賢應確核事蹟倘名實不能相副及僅以人品學問空言譽美並無  
實跡者卽行指駁等語今查該省送事實冊內開已故江蘇崑山縣先儒顧炎武植躬清峻砥行端方講求經世之學歷覽天下府州  
縣志及歷代奏疏文集復周流西北偏行邊塞得之目驗成一百二十卷曰天下郡國利病書別有一百卷曰肇域志又著有音學五  
書考古功深斟酌允當其餘所著有日知錄三十二卷五經同異三冊左傳杜解補正三卷九經誤字一卷石經考一卷金石文字記  
六卷求古錄一卷吳才老韻補正一卷二十一史表十卷歷代宅京記二十卷昌平山水記二卷十九陵圖志六卷萬歲山考一卷岱  
岳記八卷北平古今記十卷建康古今記十卷營平二州史事六卷蕪錄十五卷詩律蒙告一卷其他雜著不可枚舉所有顧炎武題  
請入祀鄉賢之處係屬名實相副臣等謹擬准其入祀鄉賢祠再此本向歸彙題合併聲明臣等未敢擅便謹題請旨於道光二十一

年十二月十七日題十  
九日奉旨依議欽此

穆案先生著書之可攷者日知錄三十二卷

衍生云潘稼堂先生攜至閩中同汪晦庵先生刻 四庫書收入子部雜家類三有提要一篇 案坊間有大小二版本又有嘉定黃汝成集釋本

云曾得潘次耕刪節元秩許瀚案吳縣王亮生藏一抄本黃曾借校其本乃未經清刪者耳瀚親見之

補遺四卷 有神珍本

古音表三卷 易音三卷 詩本音十卷 唐韻正二

十卷 音論三卷 統名音學五書

衍生云五書刻於淮上後為張力臣鬻於安溪李公 案潘稼堂有訪顧亭林先生遺書不得詩序音學五書刻於淮浦張力臣家力臣亡其子以板質於人不可復問則以為力臣

鬻之者誣也 四庫書收入

五經同異三卷 有常熟蔣氏刻本 衍生書目無 左傳杜解補正三卷

衍生云爵憲張又南先生捐貲刻 四庫書收入經部春秋類四有提要一篇

九經誤字一卷 四庫書收入經部五經總義類有提要一篇

五經攷一卷 四庫書收入史部目錄類二有提要一篇

求古錄一卷 衍生書目無 四庫書收入史部目錄類三有提要一篇 彭文勤知

聖道齋集

金石文字記六卷

四庫書收入史部目錄類二有提要二篇 竹垞有辯金石文字記一條見徐健庵日下舊聞攷序

韻補正一卷

衍生書目作二卷 四庫全書收入經部小學類三有提要一

昌平山水記二卷 文集六卷

養新錄 顧甯人文集初印本有讀隋書一篇本馬貴與之說甯人手鈔之意欲採入日知錄潘次耕誤仍為顧作乃以讀隋書為題收入集中今本無此篇則次耕已覺其謬矣

詩

集五卷 衍生云已上七種潘稼堂先生捐貲刻

誦觚一卷 四庫全書地理類存目有提要一篇

顧氏譜系攷一卷

衍生云已上二種潘稼堂刻譜系攷作顧氏譜略

二十一史年

表十卷 天下郡國利病書一百卷

有四龍氏聚珍版本 四庫全書地理類存目一有提要一篇

歷代宅京記二十卷

四庫書目歷代下有帝王二字收入史部地理類一



蘇州府志云。一作歷代都城宮闕攷二十一卷。十九陵圖志六卷。徐譜案。潘稼堂星先生詩注云。有昌平山水等圖。當即此書。萬歲山攷一卷。肇域記一百卷。記一作志。嚴杰云。肇域志。

手彙。今存仁和許周士主政家。蠅頭小楷。一筆不苟。蘇州府志曰。今存山東二册。

岱嶽記八卷。北平古今記十卷。建康古今記十卷。營平二州史事六

卷。四庫總目。又有營平二州地名記一卷。收入史部地理類三。有提要一篇。菴錄十五卷。詩律蒙告一卷。救文格論一卷。蘇州府志。又有菴錄一卷。下學指南一卷。

當務書六卷。菴中隨筆三卷。有曲阜孔氏刻本。徐譜案。拜經樓詩話載。詩律蒙告一條。注云。見菴中隨筆。今刻本無。官田始末攷一卷。京東攷古錄一卷。此書

吳震方說鈴中收之。四庫書存目。謂其文皆見炎武所撰日知錄。及昌平山水記。殆震方勸取別行。僞立此名也。案衍生書目。本有此名。提要殊武斷。蓋先生所著書。其精華無不采入日知錄者。不但此一書也。山東攷古錄一卷。此及京東

攷古錄。四庫全書地理類存目。各有提要一篇。熹廟諒闇記一卷。聖朝記事一卷。又近有一統志案說一書。乃襍纂方輿紀要中總

論。合爲一編。坊賈不知其爲宛溪。題曰顧亭林原本。其妄蓋不待辯也。

松案。先生勘定之書。有西安府儒學碑目。見先生文集。有勘定家訓。近儒名論甲集。見先生手蹟。有纂

錄易解。程朱各自爲書。見答汪苕文書。有纂錄南都時事。近坊刻有聖安皇帝本紀。二卷。題先生撰。疑即此書。見與戴耘野書。有點定

荀悅漢紀。見潘稼堂重刻漢紀序。有區言五十卷。治河事一秩。見何義門菴中隨筆序。有備錄。見江左

十五子詩選注。案詩選徐昂發關索詩注引顧亭林備錄又嘗欲編輯姓氏書。健庵有與先生論姓氏書見日知錄。徐譜

王山史山志顧亭林古所謂義士不合於時以游爲隱者也。丰姿不揚而留心經術胸中富有日新不易窺測下筆爲文直入唐宋大家之室講明音韻克傳絕緒他所爲日知錄金石文字記天下利病諸書卷秩之積幾於等身朝野傾慕之行誼甚高而與人過嚴詩文矜重心所不欲雖百計求之終不可得。或以致怨弗顧也。居恆自奉極儉辭受之際頗有權衡四方之游必以圖書自隨手所鈔錄皆作蠅頭行楷萬字如一每見予輩或宴飲終日輒爲攢眉客退必戒曰可惜一日虛度矣其勤厲如此所著昌平山水記二卷巨細咸存尺寸不爽凡親歷對證三易稿矣而亭林猶以爲未愜正使博聞強記或尙有人而精詳不苟未見其倫也。山志又載先生論假借轉注一條論極乖刺與先生平日之說正相反蓋係山史誤記故不取也

又曰博稽詳研發前人所未發爲不朽之業者顧亭林之於音韻梅定九之於曆數顧景范之於地理也。

又曰劉太室居母喪三十六月除服顧亭林馳書論之謂先王制禮不敢過也秦俗以是日謂之三周親友送卽吉之儀至有稱賀者亭林曰君子有終身之喪祭日之謂也哀之不暇而何賀焉或有言以次日舉者亭林比之朝祥莫歌之類斯不易之言也。

又曰。予嘗作三案論。獨是移宮。而於挺擊紅丸。不盡同東林諸君子之意。亭林頗然之。

閻百詩。南雷黃氏哀詞。當髮未燥時。卽愛從海內讀書者游。博而能精。上下五百年。縱橫一萬里。僅僅得三人焉。曰錢牧齋。宗伯也。曰顧亭林。處士也。及先生而三。先生云亡。上距牧齋薨。已三十有二年。卽

亭林歿。亦且十四五年。

穆案。南雷卒於康熙乙亥。距先生之亡。實十三年。

蓋至是而海內讀書種子盡矣。

潛邱劄記。有與戴唐器書云。十二聖人者。錢牧齋。馮定遠。黃南雷。呂晚村。魏叔子。汪荅文。朱錫鬯。顧梁汾。顧甯人。杜于皇。程子上。鄭汝器。更增喻嘉言。黃龍士。凡十四人。謂之聖人。乃唐人以蕭統爲聖人之聖。非周孔也。

李文貞顧甯人小傳。自幼博涉強識。好爲蒐討辯論之學。十三經諸史。旁及子集稗野。列代名人著述。微文碎義。無不攷究。騎驢走天下。所至荒山頽阻。有古碑版遺蹟。必披榛菅。拭斑蘚。讀之。手錄其要以歸。十餘歲。至七十而老。勤如一日。於六書音義。尤有獨得。余始官庶吉士。曾相遇爲半日話。又七年復來京師。則甯人歿矣。聞其書已成。亟求觀之。甯人之學。於是始窺其備。有顧氏之書。然後三代之文可讀。雅頌之音各得其所。自漢晉以來。未之有也。書旣刻。厚自寶祕。曰。五十年後。乃有知我者耳。衛先生爾錫言。其地理書。用心尤多。然未見也。孤僻負氣。譏訶古今。人必刺切。徑情傷物。以是吳人訾之。然近代博雅淹洽。未見其比。

潘次耕日知錄序。崑山顧甯人先生。生長世族。負絕異之資。潛心古學。九經諸史。略能背誦。尤留心當世之故。實錄奏報。手自鈔節。經世要務。一一講求。當明末年。奮欲有所自樹。而迄不得試。窮約以老。然憂天閔人之志。未嘗少衰。事關民生國命者。必窮源溯本。討論其所以然。足跡半天下。所至交其賢豪長者。攷其山川風俗。疾苦利病。如指諸掌。精力絕人。無它嗜好。自少至老。未嘗一日廢書。出必載書數簾。自隨。旅店少休。披尋搜討。曾無倦色。有一疑義。反復參攷。必歸於至當。有一獨見。援古證今。必暢其說。而後止。當代文人才士甚多。然語學問。必斂衽推顧先生。凡制度典禮。有不能明者。必質諸先生。墜文軼事。有不知者。必徵諸先生。先生手畫口誦。探源竟委。人人各得其意去。天下無賢不肖。皆知先生爲通儒也。

又贈先生六十壽序。先生之學。邃于經術。而又洞達當世之故。其言覈而通。大而有體要。上自經籍圖史。方輿音律。下至名物器數。元元本本。至精至悉。有功後學。不在康成下。

湯孔伯有答先生書云。前歲山史自關中見訪。詢及交游名賢。卽曰吳郡顧先生。品高學博。國家典制。郡邑掌故。天文曆象。河漕兵農之屬。無不洞悉原委。坐而言。起而可見。諸行事。真當今第一有用儒者也。後晤甫草。元禮。計東字甫草。舉人。葉舒崇。字元禮。進士。俱吳江人。往往言與山史同。吾道之衰久矣。得大力闡明。豈非斯人之幸。

汪荅文答從弟論師道書。僕宦游十五年矣。其有經學修明者。得二人焉。曰顧子甯人。李子天生。

朱錫鬯靜志居詩話論先生詩云詩無長語事必精當詞必古雅抒山長老所云清景當中天地秋色庶幾似之。

繆天自云

天自名永謀一名泳又字于野嘉興人有苻溪集

詩有俚語經顧甯人筆輒典

無名氏隨筆記先生一日在京師酒次王漁洋問樂府蝴蝶行能記否先生應口誦之不失一字蝴蝶

行最詰屈難讀學者所不經意者也漁洋歎服

穆案此事未得其年附記於此

王蘭泉昶與汪容甫書聞顧亭林先生少時每年以春夏溫經請文學中聲音宏敞者四人設左右坐置注疏本於前先生居中其前亦置經本使一人誦而已聽之遇其中字句不同或偶忘者詳問而辯論之凡讀二十紙再易一人四人周而復始計一日溫書二百紙十三經畢接溫三史或南北史故亭林先生之學如此習熟而纖悉不遺也

江藩漢學師承記炎武生性兀敖不諧於世身本南人好居北土嘗謂人曰性不能舟行食稻而喜餐麥跨鞍

程魚門晉芳正學論亭林黎洲博極羣書其於古今治亂興廢得失之數皆融貫於胸中因筆之於書以爲世法

李子德哭顧亭林先生詩一百韵朝籬初零露浮雲忽障天史無正月紀星脫少微躔一代摧梁木千

春恨杜鵑，典刑今頓墜。文獻爾俱全，際剝哀吾道。瞻印失大賢，渾思焚著述。未忍沒周旋，勁節堪追溯。名家敢溢傳，門詳吳郡後。望庇武陵前，畫省基藩牧。彤毫珥御鈿，鍾靈簪紱第。比美孝廉船。先生曾大父自方伯陞侍

即大父贊善兄弟舉閱閱窺芳矩，詞宗起卅年。友兼鄉國盛，聲挾俊廚駢。少登復社勝地頻交軫，留都幾著鞭。銜杯才最

逸，搦管賦誰先。吐納蒼江麗，招尋紫陌連。同過遵石渚，獨步採香荃。競睹潛修洽，徐教懿緒延。遭時傷失路，振翼爽乘權。上客逍遙久，佳人契約偏。徒勞殷密勿，莫與救迍躔。海涸龍虛碎，山頽鳳不還。難求

雛翮好，漫惜領珠圓。剖血探危躅，攀髯少並肩。鼎湖仍問渡，喬嶽遠懷仙。信宿寒郊址，恭闔寢廟壘。為孝

圖裝潢勤更肅，拂拭對增虔。沐髮嘗辭舍，備身偶就廛。北來馳險阻。北謁十三陵南嚮灑潺湲。壞邸詢遺迹，

荒圻拜故阡。湯孫昭穆萃，漢祖壁壙堅。歷歷捫松檟，兢兢執豆籩。金盃澄有赫，碧瓦秀含煙。灑掃甘從事，勳華恥讓鑄。著昌平山水記特書森具體，凡例發流泉。古兆原分立，斯文實創編。班揚愁視甚，左馬色蒼然。

自此淹羈旅，餘齡肯棄捐。經搜墳典闊，世譜乞提懸。似欲超吟詠，何曾叩偃佺。雄心灰弗已，績學勵相宣。逮夜隨燒燭，長征亦費研。驅車攜竹笈，入肆展霜箋。疊案皆親注，盈牀益勉旃。纖瑕攻琬琰。所論多補古人之誤

細字炳丹鉛，取誌惟徵邑。著利病書必欲盡考縣志遺聞迴匯川，訐謔周利病。往冊賴刪詮，屢易猶藏稿。通行且待緣。

昌言昭日錄。著日知錄。暇力正詩篇。著音學五書。轉叶音何陋。葩騷韻累遷。爰稽三頌始。盡洗六朝愆。憤樂忘頭白。

遨遊任足穿。觀恆趨裔塞。踐漫涉層淵。積雪貞珉皎。厓藤側蔓纏。謂宜輕櫂。翻喜跨鞍韉。到處逢迎。

備臨歧指顧。牽公卿雖倒屣。華寶每安絃。鄴架抽光數。郇廚領味專。食不兼味。晴暎裝澹澹。素魄坐娟娟。桂。

辣寧知老。松疎那受憐。刊垂資祖籍。把贈解囊錢。晚結菟裘計。將除蘊藻田。隰苓聊近採。關阜儘高褰。

旬服羣推首。邦衢舊象乾。王風留黍稷。伯略杏鷹鷗。遂逆洪河浪。因窮太華巔。臺祠洵曠舉。因朱文公會主管靈臺觀

倡爲。縣宰得循員。華陰令。選君任其事。亭林歿途陪享。濁俗多崇墨。豪耆半雜禪。迷津煩拯助。出谷仗陶甄。漸覺嚶鳴侈。俄開。

霽景鮮。盍簪要奮激。傾蓋及狂顛。縞帶曾貽晉。先生初同曹司農公過雁門。晤余於陳使君席上。清觴再集燕。嗣飲襲宗伯公宅。愚蒙沾善誘。

等列荷區銓。謬許私盟牒。允期軼草元。深恩鴻鴈並。暫別鯉魚聯。卜宅推中表。寓表弟長源家。披帷共醉眠。頗。

耽亭水潔。遲眺徑花妍。匣劍舒悲嘯。堂琴寫靜便。縱談衷曲盡。遐寄物情蠲。鬼微喧飛檄。神州滿控弦。

縈腸彌悵望。叱馭復翩翾。積歲兵機稔。中宵客慮煎。匿形乖辟穀。覘夢罷迴旻。憶昨登嵩少。悽其俯澗。

漣。凌晨謀稅野。決意謝歸舩。抵絳依重郭。去秦居曲沃。誅茅假數椽。泣麟微旨在。衰鳳託終焉。臘杪纔呼走。

遣使往。冰嚴薄餽綿。報章驚絕筆。長起承報余詩二十四韻夕卒。幽怨屈空拳。耿介標孤性。忠誠冠八埏。末繇齎志展。疇使。

訊起居。

抱痾痊。彼網欣。通鶴維巢。訝類鳶。心休沿板蕩。目視爲戈鋌。恐逸陽秋撰。須存卽次鼈。外甥俱雋哲。三

徐公司寇太史相國

猶子已騰騫。

令姪中翰君洪善

幸接旁陰茂。當提主器儻。聖途湮豈斷。儒術衆疑悛。鏡具睽峯壑。生芻

布几筵。輓旌悲浩漫。墓樹想葱芊。直擬歌黃鳥。真應駕白蓮。招魂稱至德。陟降蔣山邊。潘次耕己西冬。自淮陰抵平原。呈亭林先生六十韻。耆德何寥落。人倫孰楷模。斯文知未墜。夫子實通儒。世德推江表。高名冠海隅。才猷鼎鼐重。器略廟堂須。妙譽歸人傑。英姿識鳳雛。風雲遲絕足。羽翼礙天衢。築版功名遠。躬耕心事紆。勞勞悲擊楫。渺渺欲乘桴。廿載中原客。單車萬里驅。北游頻五岳。作賦幾三都。漢塞雲隨鴈。秦關月照榆。胸中百郡志。掌上列邊圖。

先生有昌平山水等圖

結客傾豪俊。論文盡顧廚。襟懷小天地。聞見溢

寰區。學貫天人奧。身苞造化樞。大文經緯著。讜論古今臚。賈馬寧方駕。班揚敢竝趨。才高道乃契。心小聖爲符。雅痛微言絕。深嗟學術殊。幾年犁傳注。百代掃榛蕪。精理通爻象。鴻猷擴典謨。禮堂尊講席。絳帳盛生徒。小子深瞻仰。通家自友于。追陪憶往歲。侍從足歡娛。嵇阮交原厚。陳雷好不渝。時時枉高駕。往往到菰蘆。永漏杯同把。明鐙筆共濡。情深等膠漆。調叶比笙竽。各矢青雲志。祇愁白日徂。龍蛇夢俄兆。鵬鳥讖堪吁。向子聞鄰笛。王公憶酒罏。遙知悲宿草。無處奠生芻。落魄餘文舉。伶仃有少孤。素絃哀絕調。枯樹慘同株。戢影依慈母。含辛對阿奴。向人言慷慨。伏枕淚模糊。流浪來淮市。飄零客射湖。江關



淹歲月。縱跡混泥塗。范叔綈袍盡。相如四壁無。三秋長旅食。半刺只窮途。詎敢題鸚鵡。那堪聽鷓鴣。壯懷感馬援。歧路畏楊朱。愁到思投筆。窮來未棄襦。橘甯爲枳變。蘭不效蕭敷。把卷難窮牖。編書亦絕蒲。三冬曼情惜。一榻幼安俱。汲古慚修綆。攻文愧小巫。孤生原譴劣。曲學況牽拘。窺豹非全目。雕蟲豈壯夫。夙懷期負笈。雅志有懸弧。碩德惟劉董。儒宗有鄭盧。龍門雖自峻。蠡測肯辭愚。問字侯芭去。傳經服慎呼。贏糧非早暮。命駕敢踟蹰。汝野黃雲凍。沂山白草枯。隻身經雨雪。遠道涉崎嶇。捧杖微誠遂。橫經鄙願輸。驚駘還賴策。蓬草或堪扶。斧削資良匠。陶鎔付大鑪。垂恩無以報。感激一微軀。又呈亭林先生一首。尼父志不達。浩然動歸思。羣材良斐然。裁成將待誰。迴車訂六籍。制作通神祇。三年致祥麟。大道以不墜。海內有先生。人倫之宗師。學惟天人貫。道乃汗隆宜。嚴冬霜雪集。萬木爲之萎。孤根獨巋然。知天未喪斯。周游遍五岳。歷覽環三垂。天地有大文。一一爲搜披。成書藏名山。故里歸何遲。下國寡良材。斧斤諒難施。區區園葵意。朝陽甯見知。何當裹糧去。萬里相追隨。泰岱峯嶢嶢。日觀路險巖。一覽小天。下慰此平生期。

王山史拜亭林先生墓詩。三年客江東。兩度撫君墓。野日滋宿草。秋花淒零露。緬惟同心交。明誓金石固。稽古啓愚昧。敏求祛冥悟。惠然止吾廬。一似形影附。同泣鹿馬石。手攀神烈樹。倏更四十春。戚戚不忘故。疇昔夢雲闕。白衣從玉輅。連蜷下大荒。偃蹇問天步。歎息桑榆景。裴回崦嵫暮。幽明事已非。生死

情一訴。灑淚歸山去。長辭西州路。又哭墓詩云。與君長別九年矣。白馬重來千里餘。獨拜荒邱淒宿草。更揮老淚問遺書。爲憶神明恆若存。莫將封禪比文園。當年羊傅徒輕爵。何似龍門有外孫。葉封山志序。屢余獲交胤。

山顧亭林先生。亭林於當世士。多否少可。獨亟稱華陰王山史先生。已山史至京師。余一見輒心儀之。顧恩惠別去。比亭林就居山史之家。兩人皆好學。惇行。志相得也。康熙壬戌歲。莫余客揚州。山史亦來。則先是出游。將二盈稔。聞亭林之歿。且周歲矣。



# 黎洲先生世譜

姚江黃氏。漢潁川之後。靖康之亂。遷於婺源。有仕爲慶元通判者。金人破慶元。不屈死之。子三人。分地避

兵。一居定海。

東發之始祖。

一居慈谿吳巖。一居鳳凰山竹墩。居竹墩者。諱萬河。字時通。號鶴山。居三十年。又徙

餘姚之竹橋。

柳道傳詩。連延黃竹浦是也。

則黎洲先生之始祖也。當是時離亂之餘。力田給食。不遑詩書之業。故以下四

世皆失名諱。第七世文茂。字茂卿。始登泰定甲子進士第。授餘姚州判。從學吳章廬歸。而主教於鄉。每令學者靜坐數日。然後得親函丈。子三人。德彰。至順庚午進士。任浙江宣司。德順。以制舉授鄞縣教諭。德澤。武舉。以都元帥鎮定海。又一世均保。號菊源。洪武庚午貢士。北平道御史。墀與同邑陳子方。當遜國之難。賦詩爲臣。眞欲效全忠。豈料翻成與叛同。北狩緣藏青史筆。南還猶是白頭公。赴水死。失其世次。第十世韶。字九成。成化己丑進士。仕至江西提學僉事。翊。字九霄。書畫皆入能品。而菊花尤傳於世。九成有道南八景詩。其和者。華亭張東海。常熟桑民懌也。伯川。字德洪。號蜚菴。舉順天壬午。除建寧府教授。主考陝西。有竹橋十咏。同邑倪小野。稱其蕭散閒遠。超於塵外。珣。字廷璽。成化辛卯鄉試榜首。登辛丑進士第二。歷官南冢宰。逆瑾勒令致仕。卒諡文僖。第十一世堂。字勉敬。號南浦。宏治壬戌進士。擬第一甲。未傳臚而卒。鄉人至今稱爲探花也。嘉愛。字懋仁。號鶴谿。正德戊辰進士。從王文成講學。卒官欽州。嘉會。字懋禮。號履

齋舉宏治辛酉。知金溪縣。嘉仁號半山。其詩清新。不加雕繪。有自然之色。第十二世夔。字子韶。嘉靖乙卯貢元。從文成於稽山書院。第十三世尙質。號醒泉。舉嘉靖己酉。守景州。致仕詩。與山人楊珂齊名。第十五世球。字鳳署。萬曆庚戌進士。譜繁不能盡書。書其著者。黎洲之世。自州判叔父世堂。而名諱始可得詳。世堂。生文貴。文貴生子尹。子尹生安祥。安祥生廷杲。廷杲生璽。字廷璽。兄伯震。出商於外。踰十年不歸。璽往求之。裂紙數百張。繕寫兄之年貌籍貫。爲零丁榜之。寺觀街市。經行萬里。卒無所遇。不懈益虔。流轉襄漢間。至道州。入廁。置傘路旁。伯震適過之。見傘而心動。曰。此吾鄉之傘也。循其柄而視之。有字一行。曰。姚江黃小雷記。小雷者。璽之別號。伯震方疑駭。璽出而相視。若夢寐。慟哭失聲。道路觀者。亦嘆息泣下。遂奉兄而歸。廷璽生諒。號素菴。舉義倉之法於里中。年八十。素菴生稔。號東河。娶章氏。撫其孤子。孤子入城市。必向其所之。而立待其歸。始食。未嘗先一飯也。守節數十年。東河生大綬。號對川。爲人精敏。十五歲。官役爲庫子。老吏不能欺之。知其孫忠端公必貴。嘗問之曰。孫之推封其祖父。何品及之。對曰。三品。忠端公以七品死節。故老言其不驗。未幾贈官三品。追封對川爲太僕寺卿。對川生曰中。號鯤溟。以易爲大師。諸生應試。以文先定其次第。無不奇中。五經。左氏。內外傳。國策。莊騷。隨舉一句。應口誦其全文。與人言。亦必原本經傳。忠端公之喪。蔣令弔之於途。公曰。此郊弔也。明府以春秋起家。豈宜有此。一邑利害。他人不敢言者。公獨言之。有伍伯倚令勢。魚肉小民。公投以治生帖。伍伯叩頭請死。吏亦從此不敢近伍伯。公之逆案。尙

書某使其僮客越境追人。公呼僮客杖之曰：吾非杖汝，聊以此寄汝主耳。其疾惡如此。鯤溟生忠端公諱尊素，字真長，號白安。天啓閒官御史，劾魏忠賢、客氏，削藉。三吳訛言翻局，以公爲主，逆奄忌而害之。贈官賜祭葬，諡忠端。黎洲先生名宗義，字太沖，號黎洲，忠端公之長子也。忠端公五子，著者三人：宗炎，字晦木，宗會，字澤望，自鶴山至先生，爲世凡十七云。南雷里，唐謝遺塵之故居在焉。距竹橋數里而近。先生因以名集。大述黃氏世譜，冠於集端，倣胡助述宋氏世譜，以冠潛溪集之例也。門人萬斯大述。



# 國史儒林傳

顧炎武，字甯人，初名絳，崑山人。明贊善紹芳孫。年十四爲諸生，耿介絕俗，不與人苟同。惟與同里歸莊相善。相傳有歸奇顧怪之目。其論學以博學有恥爲先。嘗與友人論學云：百餘年來之爲學者，往往言心性而茫然不得其解也。命與仁，夫子所罕言，性與天道，子貢所未得聞，性命之理，著之易傳，未嘗數以語人。其答問士則曰：行己有恥，其爲學則曰：好古敏求。其與門弟子言，但曰允執厥中，四海困窮，天祿永終。其告哀公明善之功，先之以博學。顏子幾於聖人，猶曰博我以文，自曾子而下，篤實莫若子夏。言仁，則曰博學而篤志，切問而近思。今之君子則不然，聚賓客，門人數十百人，與之言心性，舍多學而識以求一貫之方，置四海之困窮不言，而講危微精一，是必其道高于夫子，而其弟子之賢于子貢也。我弗敢知也。孟子一書，言心性亦諄諄矣，乃至萬章、公孫丑、陳代、陳臻、周霄、彭更之所問，與孟子之所答，常在乎出處去就，辭受取與之間，是故性也，命也，天也，夫子之所罕言，而今之君子之所恆言也。出處去就，辭受取與之辨，孔子孟子之所恆言，而今之君子所罕言也。愚所謂聖人之道者，如之何？曰博學於文，曰行己有恥，自一身以至於天下國家皆學之事也。自子臣弟友，以至出入往來，辭受取與之間，皆有恥之事也。士而不先言恥，則爲無本之人，非好古多聞，則爲空虛之學，以無本之人，而講空虛之學，吾見其日從事於



聖人去之彌遠也。又曰：今之理學禪學也，不取之五經論語，而但資之語錄，不知本矣。其論文，非有關於經旨世務者，皆謂之巧言，不以措筆。故炎武之學，大抵主於斂華就實，救弊扶衰。凡國家典制，郡邑掌故，天文儀象，河漕兵農之屬，莫不窮究原委，考正得失，而又廣交賢豪長者，虛懷商榷，不自滿假。作廣師篇云：學究天人，確乎不拔，吾不如王錫闡；讀書爲己，探頤洞微，吾不如楊雪臣；獨精三禮，卓然經師，吾不如張爾岐；蕭然物外，自得天機，吾不如傅山；堅苦力學，無師而成，吾不如李容；險阻備嘗，與時屈伸，吾不如路安卿。

穆案：本集所舉十人，皆稱其字，此改稱名，國史體也。而楊雪臣名瑞，路安卿名澤溥，獨仍而不改何也。

博聞強記，羣書之府，吾不如吳任臣；文章爾雅，宅心和

厚，吾不如朱彝尊；好學不倦，篤於友朋，吾不如王宏撰；精心六書，信而好古，吾不如張弼；至於達而在位，其可稱述者，亦多有之。然非布衣之所得議也。炎武生平精力絕人，自少至老，無一刻離書。國朝稱學有根柢者，以炎武爲最。炎武撰天下郡國利病書一百二十卷，歷覽諸史、圖經、實錄、文編、說部之類，取其關於民生利病者，且周流西北，歷二十年，其書始成。別有肇域志一編，則考索利病之餘，合圖經而成者。炎武精韻學，撰音論三卷，言古韻者，自明陳第，雖創闢榛蕪，猶未邃密。至炎武，乃推尋經傳，探討本原，又詩本音十卷，其書主第詩無協韻之說，不與吳棫本音爭，亦全不用補音之例，但卽本經之韻互考，且證以他書。明古音原作是讀，非有遷就，故曰本音。又易音三卷，卽周易以求古音，考證精確。又唐韻正二十卷，韻補正一卷，古音表二卷，皆能追復三代以來之音，分部正帙，而知其變。自吳才老而下廓如也。炎武又

撰金石文字記、求古錄、與經史相證、歐趙洪王不及其精、而日知錄三十卷、尤爲炎武終身精詣之書、蓋積三十餘年而後成、凡經史、吏治、財賦、典禮、藝文之類、皆疏通考證之、炎武又以杜預左傳集解、時有闕失、作杜解補正三卷、其他著作、有石經考、二十一史年表、歷代帝王宅京記、亭林文集詩集、營平二州地名記、昌平山水記、山東考古錄、譎觚、菰中隨筆、救文格論等書、並有補於學術世道、初炎武嗣母王氏、未嫁守節、嘗斷指療姑、於崇禎十年被旌、及聞明亡、不食卒、誠炎武勿出仕、福王時、崑山令楊永言薦炎武爲兵部司務、旋以職方郎召、皆未赴、旣葬母、遂出遊、歷遭艱險、所至之地、以二騾二馬載書、遇邊塞亭障、呼老卒詢曲折、有與平日所聞不合、卽於坊肆中發書對勘、或平原大野、則於鞍上默誦諸經注疏、在華陰、與王宏撰等、於雲臺觀側、建朱子祠、康熙間、詔舉博學鴻儒科、又修明史、大臣爭薦之、並辭未赴、康熙二十一年、卒於華陰、年六十九、穆案、先生年七十卒於曲沃、此皆誤、無子、門人以其喪歸葬崑山、吳江潘耒敘其遺書行世。



# 神道表

鄞全祖望鮎埼亭集

顧氏世爲江東四姓之一。五代時由吳郡徙徐州。

穆案徐乃  
滁之譌。

南宋時遷海門。已而復歸於吳。遂爲崑山縣之

花浦村人。其達者始自明正德間。曰工科給事中廣東按察使司僉事溱。及刑科給事中濟。刑科生兵部侍郎章志。侍郎生左贊善紹芳。及國子生紹芾。贊善生官廕生同應。同應之仲子曰絳。卽先生也。紹芾生同吉。早卒。聘王氏未婚守節。以先生爲之後。先生字曰甯人。乙酉改名炎武。亦或自署曰蔣山傭。學者稱爲亭林先生。少落落有大志。不與人苟同。耿介絕俗。其雙瞳子。中白而邊墨。見者異之。最與里中歸莊相善。共遊復社。相傳有歸奇顧怪之目。於書無所不窺。尤留心經世之學。其時四國多虞。太息天下乏材。以至敗壞。自崇禎己卯後。歷覽二十一史。十三朝實錄。天下圖經。前輩文編說部。以至公移邸抄之類。有關於民生之利害者。隨錄之。旁推互證。務質之。今日所可行而不爲。泥古之空言。曰天下郡國利病書。然猶未敢自信。其後周流西北。且二十年。通行邊塞亭障。無不了了。而始成。其別有一編曰肇域志。則考索利病之餘。合圖經而成者。予觀宋乾淳諸老。以經世自命者。莫如薛艮齋。而王道夫。倪石林。繼之。葉水心。尤精悍。然當南北分裂。聞而得之者多於見。若陳同甫。則皆欺人無實之大言。故永嘉永康之學。皆未甚粹。未有若先生之探原竟委。言言可以見之施行。又一稟於王道。而不少參以功利之說者也。最精韻學。能

據遺經以正六朝唐人之失。據唐人以正宋人之失。欲迫復三代以來之音。分部正秩。而究其所以不同。以知古今音學之變。其自吳才老而下廓如也。則有曰音學五書。性喜金石之文。到處卽蒐訪。謂其在漢唐以前者。足與古經相參考。唐以後者。亦足與諸史相證明。蓋自歐趙洪王後。未有若先生之精者。則有曰金石文字記。晚益篤志六經。謂古今安得別有所謂理學者。經學卽理學也。自有舍經學以言理學者。而後邪說以起。不知舍經學。則其所謂理學者。禪學也。故其本朱子之說。參之以慈谿黃東發日抄。所以歸咎於上蔡橫浦象山者甚峻。於同時諸公。雖以苦節推百泉二曲。以經世之學推梨洲。而論學則皆不合。其書曰下學指南。或疑其言太過。是固非吾輩所敢遽定。然其謂經學卽理學。則名言也。而日知錄三十卷。尤爲先生終身精詣之書。凡經史之粹言。具在焉。蓋先生書尙多。予不悉詳。但詳其平生學業之所最重者。初太安人王氏之守節也。養先生於襁褓中。太安人最孝。嘗斷指以療君姑之疾。崇禎九年。直指王一鶚。請旌於朝。報可。乙酉之夏。太安人六十。避兵常熟之郊。謂先生曰。我雖婦人哉。然受國恩矣。果有大故。我則死之。於是先生方應崑山令楊永言之辟。與嘉定諸生吳其沆。及歸莊共起兵。奉故鄣撫王永祚。以從。夏文忠公於吳江東。授公兵部司務。事旣不克。永言行遁去。其沆死之。先生與莊幸得脫。而太安人遂不食卒。遺言後人。莫事二姓。次年閩中使至。以職方郎召。欲與族父延安推官咸正赴之。念太安人尙未葬。不果。次年幾豫吳勝兆之禍。更欲赴海上。道梗不前。先生雖世籍江南。顧其妻稟頗不類吳會人。

以是不爲鄉里所喜。而先生亦甚厭屨浮華之習。嘗言古之疑衆者行僞而堅。今之疑衆者行僞而脆。了不足恃。旣抱故國之感。焦原毒浪。日無甯晷。庚寅。有怨家欲陷之。乃變衣冠作商賈。遊京口。又遊禾中。次年之舊都。拜謁孝陵。癸巳。再謁。是冬。又謁而圖焉。次年。遂僑居神烈山下。遍遊沿江一帶。以觀舊都畿輔之勝。顧氏有三世僕。曰陸恩。見先生日出遊。家中落。叛投里豪。丁酉。先生四謁孝陵。歸持之急。乃欲告先生通海。先生亟往擒之。數其罪。湛之水。僕壻復投里豪。以千金賄太守。求殺先生。不繫訟曹。而卽繫之奴之家。危甚。獄日急。有爲先生求救於某公者。某公欲先生自稱門下。而後許之。其人知先生必不可。而懼失某公之援。乃私自書一刺以與之。先生聞之。急索刺還。不得。列揭於通衢。以自白。某公亦笑曰。甯人之卞也。曲周路舍人澤溥者。故相文貞公振飛子也。僑居洞庭之東山。識兵備使者。乃爲愬之。始得移訊松江。而事解。於是先生浩然有去志。五謁孝陵。始東行。墾田於章邱之長白山下。以自給。戊戌。遍遊北都諸畿甸。直抵山海關外。以觀大東。歸至昌平。拜謁長陵以下。圖而記之。次年再謁。旣而念江南山水有未盡者。復歸六謁孝陵。東遊直至會稽。次年復北謁思陵。由太原大同。以入關中。直至榆林。是年浙中史禍作。先生之故人吳潘二子死之。先生又幸而脫。甲辰。四謁思陵。事畢。墾田於雁門之北。五臺之東。初先生之居東也。以其地溼。不欲久留。每言馬伏波田疇。皆從塞上立業。欲居代北。嘗曰。使吾澤中有牛羊千。則江南不足懷也。然又苦其地寒。乃但經營創始。使門人輩司之。而身出遊。丁未之淮上。次年自山東入京。

師萊之黃氏有奴告其主所作詩者多株連。自以爲得。乃以吳人陳濟生所輯忠節錄。指爲先生所作。首之書中有名者三百餘人。先生在京聞之。馳赴山東。自請勘訟。繫半年。富平李因篤。自京師爲告急於有力者。親至歷下解之。獄始白。復入京師。五謁思陵。自是還往河北諸邊塞者。幾十年。丁巳。六謁思陵。始卜居陝之華陰。初先生遍觀四方。其心耿耿未下。謂秦人慕經學。重處士。持清議。實他邦所少。而華陰縮穀關河之口。雖足不出戶。而能見天下之人。聞天下之事。一旦有警。入山守險。不過十里之遙。若志在四方。則一出關門。亦有建瓴之便。乃定居焉。王徵君山史。築齋延之。先生置五十畝田於華下。供晨夕。而東西開墾所入。別貯以備有事。又餌沙苑蒺藜而甘之。曰。啖此久。不肉不茗可也。凡先生之遊。以二馬二騾。載書自隨。所至阨塞。卽呼老兵退卒。詢其曲折。或與平日所聞不合。則卽坊肆中發書而對勘之。或徑行平原大野。無足留意。則於鞍上默誦諸經注疏。偶有遺忘。則於坊肆中發書而熟復之。方大學士孝感熊公之自任史事也。以書招先生爲助。答曰。願以一死謝公。最下則逃之世外。孝感懼而止。戊午。大科詔下。諸公爭欲致之。先生豫令諸門人之在京者辭曰。刀繩具在。無速我死。穆案先生之辭大科。乃二徐之力。謝山蓋誤以黎洲之事例先生也。次年大修明史。諸公又欲特薦之。貽書葉學士詔庵。請以身殉得免。或曰。先生盍亦聽人一薦。薦而不出。其名愈高矣。先生笑曰。此所謂釣名者也。今夫婦人之失所天也。從一而終之。死靡慝。其心豈欲見之於人。若曰。盍

得名遂招逼迫。幾至凶死。雖曰威武不屈。然而名之爲累。則已甚矣。又況東林覆轍。有進於此者乎。有求文者。告之曰。文不關於經術政理之大。不足爲也。韓文公起八代衰。若但作原道。諫佛骨表。平淮西碑。張中丞傳後諸篇。而一切諛墓之文。不作。豈不誠山斗乎。今猶未也。其論爲學。則曰。諸君關學之餘也。橫渠藍田之教。以禮爲先。孔子嘗言。博我以文。約之以禮。而劉康公亦云。民受天地之中以生。所謂命也。是以有動作禮義威儀之則。以定命。然則君子爲學。舍禮何由。近來講學之師。專以聚徒立幟爲心。而其教不肅。方將賦茅鷁之不暇。何問其餘。尋以乙未春。出關觀伊洛。歷嵩少。曰五嶽遊其四矣。會年饑。不欲久留。渡河至代北。復還華下。先生旣負用世之略。不得一遂。而所至每小試之。墾田度地。累致千金。故隨遇卽饒足。徐尙書乾學兄弟。甥也。當其未遇。先生振其乏。至是鼎貴。爲東南人士宗。四方從之者如雲。累書迎先生南歸。願以別業居之。且爲買田以養。皆不至。或叩之。答曰。昔歲孤生。飄搖風雨。今茲親串。崛起雲霄。思歸尼父之轅。恐近伯鸞之竈。且天仍夢夢。世尙滔滔。猶吾大夫。未見君子。徘徊渭川。以畢餘年足矣。庚申。其安人卒於崑山。寄詩挽之而已。次年卒於華陰。諡無子。徐尙書爲立從孫洪慎。以承其祀。

穆案洪慎乃先生之從子

先生旣立吳江族子衍生爲嗣。又立洪慎之子世樞爲殤子。後此皆誤。

年六十九。謨門人奉喪歸葬崑山之千墩。高弟吳江潘耒收其遺書。序而行。

之。又別輯亭林詩文集十卷。而日知錄最盛傳。歷年漸遠。讀先生之書者雖多。而能言其大節者已罕。且



有不知而妄爲立傳者。以先生爲長洲人。可哂也。

穆案榕村集有顧甯人小傳。稱爲吳之長洲人。謝山蓋卽指此。

徐尙書之冢孫涵。持節粵中。

數千里貽書以表見屬。余沈吟久之。及讀王高士不庵之言曰。甯人身負沈痛。思大揭其親之志於天下。奔走流離。老而無子。其幽隱莫發。數十年靡訴之衷。曾不得快然一吐。而使後起少年。推以多聞博學。其辱已甚。安得不掉首故鄉。甘於客死。噫。可痛也。斯言也。其足以表先生之墓矣。夫其銘曰。先生兀兀。佐王之學。雲雷經綸。以屯被縛。縶然高風。寥天一鶴。重泉拜母。庶無愧怍。

# 何紹基顧先生祠詩

甲辰五月附

亭林先生祠。小子始營繕。繫惟城西偏。慈仁森佛殿。當時寺宇宏。市集萃圖卷。國初諸老儒。買書乘暇宴。先生結契廣。僑寓置鑪扇。至今雙松下。彷彿見遺躅。承平二百載。光陰若流箭。古碣餘斷龜。空梁墜飢燕。我卜隙地寬。謂可靈爽奠。諸公聞此議。合作相呼忭。畚鍤猥見屬。木甃自遴揀。刪蕪出古樹。明月夜來冑。崇崇屋三楹。爛爛秋一片。落成奉遺像。覽揆潔盟薦。肅然道義容。警我塵土賤。車徐譜歲月。張子重論譏。江南大河北。餘韻蒐討徧。張石州據車秋拾徐星翁所撰亭林年譜合爲定本增益辨正甚博且精搆稿至山東江南蒐得遺事詩文頗多勒記待貞珉。儀徵濡老硯。阮相國師記文尙未

寄到冬霽條已飄。春鸞復來嘯。次第皆識職。初終矢無倦。持衡恩命被。萬里指羅甸。五月一日紹基奉命主試貴州登程復

過祠。仰止有餘香。溯惟明代末。世苦龍蛇戰。氣節誠乃隆。兵將多不練。小儒獨何爲。俗學爭相煽。語錄飾陋窳。詞章鬪輕葺。先生任道堅。千古係後先。研窮經史通。曠朗天人見。鬱積忠孝懷。慘澹時世變。同時顧李閤。驟斬隨鞞。餘子因人成。鞭鐙亦相戀。經心執聖權。首啟熙朝彥。兵刑禮樂尊。九數六書衍。漢宋包羣流。周孔接一線。精光燦日星。果力策雷電。自非菰中人。孰開衆目眩。欽惟純廟年。四庫盛編纂。萬軸歸文淵。千士萃祕院。儀徵實後至。草創儒林傳。論學采源流。全編有芻弁。諸儒始相驚。乙覽大稱善。阮師撰國史儒林

傳以先生居首。

元氣入人心。史筆非私擅。小子雖懵學。遺書早窺眇。泊與脩史職。讀傳生歎羨。從來聖道大。青史資爛絢。微言察天地。正路化狂狷。功名與文章。因時見陶鍊。惟茲下學事。萬古有繼禪。儒林道學分。宋史安於銜。六藝天道樞。班書儒林傳語意。傳例重班掾。先生冠儒林。狂瀾植厓堰。君親鑒吾身。學行須貫穿。願從實踐入。敢恃虛談便。且當語黔士。庶弗規爲瑱。再拜別先生。歸來已寒霰。

右顧亭林先生年譜四卷。國朝張穆撰。按穆字石州平定人。優貢生。候選訓導。博學善屬文。久游京師。名動公卿。與程春海侍郎交契最深。侍郎遺集。卽其所編輯也。國朝儒者。學有根柢。以顧亭林先生爲最。繼往開來。內聖外王之道備。故阮文達國朝儒林傳稿。以先生居首。而江鄭堂漢學師承記。則以先生與黃梨洲傳附卷末焉。此自有定論。然先生與梨洲。原不專以漢學名也。是書緣起。石州自序已詳。於先生事蹟。固搜括無遺。徵引殆遍。且於勝國本朝戰守興亡全局。以至當時士大夫。暨高人逸士。與先生往還者。其前言往行。兼收博采。俾知人論世者。足資考證。正不必以其未盡合年譜體例而議之耳。又汪容甫不可一世。述學別錄。與畢侍郎書。稱中少日問學。實私淑顧亭林處士。故嘗推六經之旨。以合於世用。及爲考古之學。惟實事求是。不當墨守云云。容甫固未易才。然竊謂數語。舉以移贈先生。尤覺當之而無愧色。又孫淵如平津館文稿。呈初撫部書。謂先生所撰天下郡國利病書。是未就之稿。如能增補成書。實爲經濟要務。不獨有功於顧氏云云。此亦讀先生遺書者。所當參其末議也。又郭頻伽靈芬館雜著。有先生像贊云。古之學者。其道一貫。誰與分歧。儒林文苑。卓哉先生。自有千古。又云。浙東姚江。關中二曲。猗歟先生。莫克榮辱。德容粹然。清而不耀。遺民孝子。通才碩儒。亦足以櫟括先生生平。是譜原無卷數。釐爲四卷。重刻焉。俾聞先生之風者。頑廉懦立。亦下學指南也。咸豐癸丑八月晦日。南海伍崇曜謹跋。

